



The Catholic Reporter

Issue 134, February 2017
P9,10,19 na 20



New Bishop for Kerema Diocese

lukim stori long pes 9

Dadae i nupela Gavana Jeneral



Minista bilong Wok na memba bilong Imbonggu, Francis Awesa i tok amamas long nupela Gavana Jenerel bilong Papua Niugini Bob Dadae memba bilong Kabwum long Morobe provins. Poto Nicky Bernard.

Aja Potabe i raitim

PALAMEN i makim Memba bilong Kabwum, Bob Dadae, i kamap namba 10 Gavana Jeneral bilong Papua Niugini.

Taim bilong Gavana Jeneral Sir Michael Ogio i pinis na long kisim ples bilong em, Palamen i makim Mista Dadae long Trinde long dispela wik.

Mista Dadae wantaim pastaim memba bilong Nawaeb, Timothy Bonga na pastaim deputi praim minista na biknem PNG Difens Fos ami komanda, Edward Diro, i bin resis long kamap Gavana Jeneral bihain long taim bilong Sir Michael i pinis.

Mista Dadae i kisim 55 vot na Mista Bonga i kisim 36 vot taim ol memba bilong

Palamen i vot long makim nupela Gavana Jeneral.

Long namba wan raun, Mista Dadae i bin kisim 44 vot, Mista Bonga i bin kisim 26 vot na Mista Diro i bin kisim 20 vot.

Ol i rausim Mista Diro i go aut long resis, na larim tupela biknem lida bilong Morobe yet i resis.

Mista Dadae, husat i memba bilong Peoples' National Congress (PNC) pati bilong Praim Minista Peter O'Neill, i win bihain long 55 memba i votim em.

Mista Dadae em i bin stap olsem memba bilong Kabwum long 15 yia.

Ol pipel bilong Kabwum i bin votim em i kamap memba long yia 2002 i kam inap 2012.

Long yia 2002, em i bin kamap memba aninit long United Party. Long yia 2007, em i bin winim gen sia bilong Kabwum aninit long United Party we em i bin stap deputi pati lida.

Long Ogas 29, 2007, pastaim Somare-Temu Gavman i bin makim em i kamap Difens Minista i kam inap Ogas 2, 2011 taim Praim Minista Peter O'Neill i bin kisim ples bilong Sir Michael Somare.

Long yia 2012, Mista Dadae i bin ran long ileksen aninit long PNC Pati bilong Praim Minista O'Neill, na em i bin winim gen sia bilong Kabwum long namba tri taim.

Mista Dadae bai nau kamap namba 10 Gavana Jeneral bilong PNG.

No	Nem (Bonde-Dai)	Taim bilong ol i stap long opis	
		Stat Wok	Lusim Wok
1	Sir John Guise (1914-1991)	6 Septemba 1975	1 Mas 1977
2	Sir Tore Lokoloko (1930-2013)	1 Mas 1977	1 Mas 1983
3	Sir Kingsford Dibela (1932-2002)	1 Mas 1983	1 Mas 1989
4	Sir Ignatius Kilage (1941-1989)	1 Mas 1989	31 Desemba 1989
5	Sir Serei Eri (1936-1993)	27 Februari 1990	4 Oktoba 1991
6	Sir Wiwa Korowi (1948-)	18 Novemba 1991	20 Novemba 1997
7	Sir Silas Atopare (1951-)	20 Novemba 1997	20 Novemba 2003
8	Sir Paulias Matane (1931-)	29 Jun 2004	13 Desemba 2010
9	Sir Michael Ogio (1942-)	25 Februari 2011	1 Februari 2017



Wasa Rice 200g

Em Skel Ya

GROWN FOR THE PEOPLE OF PNG

Basil: Stretim Wau-Bulolo haiwe

Aja Potabe i raitim

GAVMAN i mas stretim Wau-Bulolo haiwe long Morobe Provins, Memba bilong Bulolo, Sam Basil, i tok.

Mista Basil i mekim dispela toktok long Palamen long las wik Fraide taim em i lukim olsem dispela namba wan rot long ples bilong em i bagarap.

“Dispela rot i bagarap na mi laikim Minista bilong Woks long tokim Woks Dipatmen long kirapim gen,” Mista Basil i tok.

Em i mekim dispela toktok long Palamen long las wik.

Mista Basil i tok Yangalimu seksen bilong Wau-Bulolo haiwe i bagarap na em i nidim wok mentenens hariap.

“Long Timini na Mare, bris i bagarap. Mi askim Minista bilong Woks long askim ol wokman bilong Woks Dipatmen long stretim dispela rot na bris.

Mista Basil, husat i deputi lida bilong oposisen, i tok Wau-Bulolo haiwe em i namba wan rot bilong dis-

pela kantri na gavman i mas luksave long dispela.

“Yumi gat Zenag kakaruk fam. Kopi i save kam long Menyama. Wafi na Golpu gol projek em i tupela namba wan invesmen.

“Hidden Valley gol main em i wanpela wol klas gol main we gavman i save kisim bikpela mani long takis.

“Planti manmeri tu i wok long dispela gol main, na planti famili i save kisim benefit long dispela main,” Mista Basil i tok.

Em i tok ol PMV kar i wok long kisim bikpela taim long dispela rot, na rot i nidim mentenens.

Minista bilong Woks na Implementesen, Francis Awesa, i tok Wau-Bulolo haiwe em i wanpela haiwe na nesanel rot insait long kantri.

Mista Awesa i tok PNG i gat 16 nesanel haiwe na rot na dispela em ol namba wan rot we ikonomi bilong kantri i save ran long en.

“Wau-Bulolo Haiwe em i wanpela nesanel haiwe. Dispela rot i save helpim ol

manmeri bilong yumi long ples, na helpim ol investa na bikpela maining kampani long mekim bisnis na kirapim ikonomi,” Mista Awesa i tok.

Em i tok gavman bai givim K20 milien long wan wan yia i go inap tripela yia long mekim ol mentenens wok na apgretim Wau-Bulolo haiwe.

“Stat long 9-mile i go inap Bulolo, dispela mani bai go long mekim mentenens wok. Kabinet i givim tok orait pinis.

“Namba wan fanding bai go long Harmony Gold Mining kampani. Ol bai holim dispela mani na mekim mentenens wok.

“K500, 000 em i namba wan mani bai mipela i givim long Harmony long mekim dispela wok mentenens long rot,” Mista Awesa i tok.

Harmony Gold Mining em i opereta bilong Hidden Valley gol maining. Wafi na Golpu maining projek tu i stap long han bilong ol.

Dispela ol maining projek em ol namba wan projek long helpim ikonomi bilong kantri.

Ol kampani bai helpim gavman long kirapim rot

Aja Potabe i raitim

ANINIT long wanpela nupela praivet pablik patnasip (PPP) program, ol bikpela kampani long maining na oil na ges indastri bai helpim gavman long kirapim ol nesanel haiwe na ol rot insait long kantri.

Praim Minista Peter O’Neill i tok dispela em i wanpela gutpela program we dispela bai lukim ol bikpela kampani olsem Oil Search, ExxonMobil, Ok Tedi Maining, na Barrick Niugini i helpim Dipatmen ov Woks wantaim ol mentenens wok long ol nesanel haiwe.

Mista O’Neill i autim dispela toktok long Palamen long las wik.

“Mi amamas long tokaut olsem sampela ol bikpela investa insait ong kantri bai helpim yumi long kirapim rot na bris bilong yumi long kantri.

“ExxonMobil na Oil Search

i wanbel long apim takis kredit skim (TCS) na aninit long dispela program, tupela kampani bai helpim Nesanel Gavman long mekim ol mentenens wok na apgretim Hailans Haiwe.

“Barrick Niugini, opereta bilong Porgera Gol Main i wanbel long kam insait long dispela program na helpim gavman.

“Dispela ol kampani i save yusim Hailans Haiwe. Ol saplai bilong ol i save yusim dispela rot na go long wan wan projek eria bilong ol.

“Mipela i luksave olsem divelopa bilong Hidden Valley gol main tu bai kam insait long dispela program na helpim Woks Dipatmen long mekim ol rot mentenens long Wau-Bulolo haiwe.

“Ok Tedi Main i ken yusim TCS mani long helpim ol manmeri bilong Telefomin na Tabubil, na pinisim rot konstraksen bilong joinim dispela tupela taun long

Westen na Wes Sepik provins,” Mista O’Neill i tok.

Mista O’Neill i tok kabinet i wanbel long dispela program na patnasip namel long gavman na ol bikpela investa insait kantri.

Mista O’Neill i bin autim dispela toktok taim em i laik bekim askim bilong Memba bilong Telefomin, Solan Mirisim, husat i bin askim em long wanem taim gavman bai givim mani long kontrakta long pinisim konstraksen wok bilong Tabubil-Telefomin rot.

Gavman i bin statim dispela nupela rot projek long yia 2012 na ol i bin plen long pinisim dispela rot long yia 2017 tasol konstraksen wok i no bihainim dispela plen.

Mista O’Neill i luksave olsem dispela rot em i namba wan rot bilong kantri na i nidim gavman na kampani wantaim long pinisim projek aninit long dispela patnasip.

Givim sampela pawa i go long gavana

Aja Potabe i raitim

NESENEL Gavman mas givim sampela pawa i go long ol gavana bilong ol wan wan provins long mekim wok bilong tuisen fi fri (TFF) edukesen polisi i kamap isi.

Memba bilong Sinasina-Yongomugl, Kerenga Kua, i tok Nesanel Gavman i mas givim sampela pawa long ol gavana long provins long wokbung wantaim ol skul na edukesen ejensi.

Mista Kua i tok nesanel gavman aninit long wanpela minista bilong Edukesen bai hat long mekim olgeta wok bilong givim skul fi na sekim ol skul.

Mista Kua i mekim dispela toktok long Palamen taim Minista bilong Edukesen, Nick Kuman, i tok aut olsem Edukesen Dipatmen i wok long mekim planti wok long skelim TFF mani i go long wan wan skul.

“Ol gavana na wan wan memba i save hamas skul i stap insait long provins na distrik bilong ol. Ol i save wanem skul i wok long sasim projek fi o tokim ol sumatin na papamama long

baim kain kain fi long putim ol pikinini long skul,” Mista Kua i tok.

Em i tok Nesanel Gavman i mas tingting long yusim ol gavana na open memba bilong wan wan distrik na helpim wok bilong nesanel gavman.

Mista Kuman i askim ol papamama na ol manmeri long tokaut sapos sampela skul i sasim kain kain skul fi mani.

“Gavman bai baim skul fi bilong olgeta sumatin long kantri. Mipela i salim K75 milien i go insait long benk.

“Ol lain long benk bai brukim na skelim dispela mani i go long wan wan akaun bilong ol skul insait long kantri,” Mista Kuman i tok.

Mista Kuman i askim ol skul long stopim pasin bilong askim ol papamama na sumatin long baim kain kain ekstra fi olsem projek fi.

Em i tok gavman i baim skul fi bilong olgeta skul na dispela i no nidim mani bilong ol papamama.

“Long namba wan taim long dispela kantri, mipela i helpim ol papamama. Mipela i baim skul fi bilong ol pikinini bilong yumi long dispela kantri.

“Mi laik askim olgeta skul i no ken sasim kain kain fi. Gavman i baim olgeta mani,” Mista Kuman i tok.

Long wankain taim, memba bilong Usino Bundi, Anton Yagama, i askim Mista Kuman sapos Edukesen Dipatmen i gat sampela polisi o lo long mekim save long ol skul husat i sasim ekstra fi long ol papamama.

“Mi laik askim sapos Edukesen Dipatmen i gat sampela kain lo long sasim ol skul na bod na menesmen wantaim het tisa bilong skul sapos ol i sakim dispela toktok bilong gavman na sasim ekstra fi olsem projek fi,” Mista Yagama i tok.

Mista Kuman i bekim na tok: “Wok bilong mipela i stap aninit long Edukesen Ekt. Dispela lo i karamapim olgeta wok bilong dipatmen, na Tising Sevis Ekt i lukautim wok bilong ol tisa.”

Em i tok gavman i laikim ol skul na bod na menesmen long harim na bihainim toktok.

“Toktok i kam long gavman em i mas go insait long ia bilong ol bos bilong wan wan skul,” Mista Kuman i tok.



Lida bilong Gavman Bisnis na Minista bilong Fainens wantaim ol narapela memba i wokabaut go insait long semba taim palamen i sindaun long namba 2 wik long Tunde. Poto Nicky Bernard.

Gavman helpim refuji long statim nupela laip

GAVMAN bilong PNG i wok long mekim ol wok aninit long agrimen long helpim ol refuji long Manus Ailan.

Minista bilong Foren Afes, Ribink Pato, i tok sampela refuji i kam aut pinis long Rijonal Prosesing Senta long Manus na ol i stap long Pot Mosbi na Lae.

Mista Pato i tok gavman i wok long helpim ol long painim wok, statim nupela laip na stap long PNG.

“Mipela i no kisim sampela moa refuji i kam insait, tasol mipela i wok long prosesim ol lain husat i stap pinis long Manus.

“Ol refuji i stap fri long

Manus, tasol mipela i les long ol i brukim lo na mekim ol samting long laik bilong ol yet.

“Yes, Suprim Kot i tok dispela agrimen bilong kisim ol refuji i kam insait na prosesim ol insait long kantri em i iligel.

“Gavman i wanbel long dispela desisen bilong kot. Mipela i redi long pasim dispela prosesing senta na nau mipela i wok long mekim ol wok long rausim ol refuji i kam aut.

“Ol lain husat i laik stap long PNG, ol i ken painim wok na statim nupela laip. Sapos ol i les, ol i ken go long sampela kantri long laik bilong ol yet.

“Tasol gavman i bihainim toktok bilong Suprim Kot na i wok long mekim ol samting long rausim ol refuji na pasim Manus ditensen senta,” Mista Pato i tok.

Em i autim dispela toktok bihain long sampela mun i go pinis taim Suprim Kot i bin tokim gavman bilong Australia na PNG long pasim dispela senta long Manus.

Memba bilong Rabaul, Dokta Allan Marat, i bin askim Mista Pato long las wik long Palamen long tok aut long wanem samting i kamap long Manus Ailan bihain long Suprim Kot i pasim dispela ditensen senta.

Tupela minista laik wokim nevi beis longwe long solwara

Aja Potabe i raitim

TUPELA senia gavman minista husat i go pas long kirapim nupela beis bilong PNG Difens Fos nevi i laik kama-pim dispela beis antap long graun na i no long solwara.

Memba bilong Kavieng, Ben Micah, i tok Minista bilong Pablik Entraprais na Stet Investmen, William Duma, na Minista bilong Difens, Dokta

Fabian Pok, i laik mekim nupela neval beis bilong PNGDF long graun long Manu Manu long Sentral Provins.

Mista Micah, husat i pas-taim Minista bilong Pablik Entraprais na Stet Investmen, i tok tupela minista i tokim Kumul Consolidated Holdings Limited (KCH) long salim K46.6 milien i go insait long benk akaun bilong Kurkuramb Estates Limited.

Namel long las yia Krismas na Nupela Yia long dispela yia, KCH i bin salim K46.6 milien i go insait long benk akaun bilong Kurkuramb Estates Limited long Kina Benk, Mista Micah i tok.

Em i tok Mista Duma i yusim pinis klostu long K15 milien long dispela mani na em i no baim dispela graun long kirapim nupela beis bilong PNGDF Nevi.

Mista Micah i askim Prais Minista Peter O'Neill long Tunde long Palamen sapos em i save olsem Minista Duma, husat i wanpela senia kabinet minista long gavman bilong em, i laik kisim dispela mani na salim i go insait long benk akaun bilong praivet kampani.

"Tupela i laik baim graun 10 kilomita longwe long solwara. Neval beis i save stap

arere long solwara tasol tupela i laik putim long graun, na salim dispela bikpela mani bilong pipel i go insait long akaun bilong praivet kampani," Mista Micah i tok. Em tok Kurkuramb em i nem bilong wanpela liklik wara ran long Mt Hagen.

Mista Micah i tok olgeta adres na pos opis bokis bilong Kurkuramb Estate Limited em wankain olsem bilong nara-

pela praivet kampani, Kopana Investments Limited.

Mista Micah i askim Prais Minista O'Neill long rausim Mista Duma long kabinet na salim em i go long Ombudsman Komisin.

Mista Duma em yet i no bin kam long Palamen long Tunde long dispela wik.

Difens Minista Dokta Pok i bin stap long Palamen na em i bin givim sait stori bilong em.



Ekting Spika bilong Palamen John Simon wantaim Klak na ol wok i redi long go insait long semba. Poto Nicky Bernard

PM: Wok painimaut bai kamap

PRAIM Minista Peter O'Neill i harim pinis wanem samt-ing i kamap long K46.6 milien Kumul Consolidated Holdings Limited (KCH) i laik yusim long baim nupela graun long muvim nevi beis bilong PNG Difens Fos.

Mista O'Neill i tok em i tokim Polis Komisina Gari Baki na Sif Seketeri Isaac Lupari long kamapim wanpela komisin ov inkwairi long mekim wok painimaut i go insait long olsem wanem KCH i yusim dispela mani long wokim nupela neval beis.

Em i mekim dispela toktok long Palamen long Tunde long dispela wik taim em i bekim askim bilong memba bilong Kavieng, Ben Micah.

Mista Micah, husat i pas-taim Minista bilong Pablik Entraprais na Stet Invesmen, i tok KCH i bin salim dispela mani i go insait long akaun bilong wanpela praivet kampani.

Mista Micah i bin askim sapos Prais Minista i save long wanpela paul pilai i wok long kamap long KCH, we KCH i givim K46.6 milien i go long wanpela kampani ol i kolim Kurkuramb Estates Limited, tasol ol i no kisim taitel bilong dispela graun yet.

Aninit long plen bilong PNGDF na KCH, dispela 867 hekta graun long Manumanu bai kamap nupela beis bilong PNGDF nevi.

Mista O'Neill i tok em i harim dispela stori pinis na

em i tokim benk long pasim benk akaun bilong Kurkuramb Estates Limited.

"Mi harim dispela toktok pinis. Siaman bilong KCH, Paul Nerau, i tokim mi pinis na mi stopim benk long rausim mani long akaun bilong dispela kampani.

"Dispela wok painimaut i wok long go het yet. Mi stopim benk long no ken larim wanpela man o meri i rausim mani long akaun bilong dispela kampani.

"Ol i no bihainim NEC desisen na mi tokim Sif Seketeri na Polis Komisina long statim wok painimaut. Bai mipela i pinisim dispela wok painimaut na givim ripot long pipel," Mista O'Neill i tok.

Duma: Mi bihainim NEC desisen

Aja Potabe i raitim

MINISTA bilong Pablik Entraprais na Stet Investmen, William Duma, i tokim Palamen olsem em i no mekim wanpela paul pasin long baim graun long Manumanu long Sentral Provins long wokim nupela nevi beis bilong PNG Difens Fos.

Long Trinde long dispela wik, Mista Duma i kliaim toktok bilong em yet long dispela bikpela toktok we memba bilong Kavieng, Ben Micah wantaim ol memba

bilong Oposisen, i bin mekim long Palamen long Tunde long dispela wik.

Mista Micah i bin tok Mista Duma i bin laik long mekim paul pasin na kisim K46.6 milien bilong Kumul Consolidated Holdings Limited (KCH), tasol Mista Duma i tok olgeta samt-ing em i mekim long baim dispela graun long Manumanu i bihainim NEC desisen.

KCH i bin laik long baim graun long dispela mani mak long wokim nupela beis bilong PNGDF nevi.

"Mi bin kisim ples bilong pastaim minista bilong Pablik Entraprais na Stet Investmen, Ben Micah.

"Dispela plen bilong muvim Lancron Naval Beis na muvim i go long Manumanu em i plen bilong Mista Micah yet.

"Lakatoi Siti projek tu plen bilong Mista Micah yet. Mi bihainim plen bilong em, na mi bihainim ol disisen bilong gavman long baim dispela graun.

"I no mi yet i bin mekim dispela desisen. Ol bod memba bilong KCH i mekim desisen.

"KCH, Dipatmen ov Difens na Lens Dipatmen i bin wok-bung long mekim dispela wok. Ol i bihainim lo na ol stretpela proses long mekim samt-ing.

"Na Stet Solisita i bin givim edvais long KCH olsem dispela trensekse em i orait, no gat wanpela paul pilai i kamap long dispela," Mista Duma i tok.

Mista Duma i tok ol miting minit bilong KCH bai soim ples kliia olsem ol bod memba bilong KCH i wanbel long baim 867 hekta bilong graun

long Manumanu long wokim nupela beis bilong nevi.

"Tripela gavman dipatmen na stet ejensi i bin wok-bung wantaim long mekim dispela. Na ol loya bilong gavman na loya bilong KCH i bin witnessim," em i tok.

Long sait bilong dispela kampani, Kurkuramb Estates Limite, Mista Duma, i tok em i no kampani bilong em.

"Mi no seaholda bilong dispela kampani. IPA rekot i soim ples kliia olsem mi no wanpela dairekta o seaholda bilong dispela kam-

pani," em i tok.

Em i tok KCH i bihainim desisen bilong bod na edvais bilong Stet Solisita long baim dispela graun.

Mista Duma i soim olgeta kopi bilong NEC desisen, olmiting minit, kampani ekstrek long IPA, na arapela evidens long Palamen.

Em i askim ol memba long lukim na sekim sapos dispela em i tru o no gat.

"Olgeta samt-ing em mi putim long hia. Mi no bin mekim wanpela paul pasin," Mista Duma i tok.

Back to School is easy with a BSP Personal Loan..

WE ARE BSP

www.bsp.com.pg

BSP PERSONAL LOAN

Visit your nearest **BSP Branch today to apply.**

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

The following branches will be open to accept School Fee Deposits **ONLY** on **SATURDAY, 28 JANUARY & 4 FEBRUARY 2017 | FROM 8:45AM - 12:00PM.**

- ✓ Boroko Branch – NCD
- ✓ Madang Branch – Madang
- ✓ Lae Market Branch – Morobe

Yu gat Rait Long Skul

Tony Sapan i raitim

Siaman bilong Lahir Maining eria len ona na asosiesen (LMALA), Mista James Laketan i tokim ol sumatin long greduesen bung bilong Sen Joseph Likambai Elementari Skul long Putput 2 olsem ol i gat rait long i go long skul tasol wanem wei ol i ken winim dispela i dipen long we ol i laik kisim dispela save.

Toktok long namba 12 greduesen bilong skul, Mista Laketan i tok bai ol i kamap

olsem wanem long bihain taim i stap long han bilong ol yet tasol em i strongim ol long yusim gut sans bilong kisim save.

Edukesen Kodineta bilong Lahir, Josephine Warmanai i tokim skul bod ov menesmen olsem ol i pawa haus bilong skul.

Em i tokim ol olsem ol i stap long strongim ol tisa, sumatin na ol lain olsem ol tingting ol i mekim long ranim skul i mas bilong helpim ol sumatin long kisim gutpela mak long skul.

Lida meri toktok long gan laisens

WANPELA meri lida bilong Bogenvil i singaut long gavman i mas putim ai gut long ol samting bilong pait i stap yet long han bilong ol pipel.

Dairekta bilong lokal NGO grup, Leitana Nehan Wimens Developmen Ejensi, Helen Hakena i tok ol samting bilong pait i ken bagarapim gutpela sindaun na sekyuriti long taim ol i redi long kamapim Referendam.

Misis Hakena em i wanpela memba bilong Small Arms Action Group long Pasifik Rijn. Em i tok ol dispela lain husat i holim ol gan i mas rejista o sapos nogat bai i mas gat sas long holim ol dispela samting bilong pait.

Em i tok PNG na Bogenvil tu i wari long taim ol gan i stap long han bilong komyuniti bikos em inap long kamapim hevi na bagarapim laip bilong ol pipel.

Em i tok em tu i wanpela mama na Bogenvil Gavman i mas kamapim yet Weapons

Disposal Program bilong rausim ol samting bilong pait insait long komyuniti.

Misis Hakena i tok ol dispela gan ol pipel i yusim tude em ol gan ol i bin yusim long taim bilong kraisis na ol i no bin givim long taim bilong rausim ol gan long 2000.

Misis Hakena i tok tu olsem ABG i mas tingting tu long boda kontrol namel long Bogenvil na ol provins i stap klostu long wanem ol gan i ken go kam namel long ol.

Em i tok pasin bilong salim buai i go kam tu i pas wantaim ol samting bilong pait olsem ol gan.

Em i askim ABG long strongim yet program bilong rausim ol gan na rejista nem bilong ol lain husat i holim ol gan.

Em i askim tu ol developmen patna long toktok long sekyuriti na wok bung wantaim long kamapim gutpela sindaun long Bogenvil.

Inspekta: Tisa mas wok hat

Paulus Tali i raitim

OL tisa i mas wok gut na wok stret, Steven Merpe, nupela skul inspekta long Tewai-Siassi, Morobe i tok.

Merpe i mekim dispela tok long taim em i kisim nupela opis bilong em long dispela yia.

Em i tok long longpela taim nem bilong Tewai-Siassi long sait bilong edukesen i no bin kamap na em i laikim senis long nupela yia.

Em i laik no gat tisa i mas kamap bihain o leit long wok, i mas kamapim gutpela wok buk, i dres gut, no ken

kaikai buai na smok insait long klas na no ken raun nating.

Em i laik bai ol i mas bihainim lo bilong tis na skulim gut ol pikinini.

Inspekta Merpe i tok em i amamas olsem i bin gat sampela liklik senis i kamap long taim bipo inspekta Jimmy Manekuai i stap tasol i laikim bai moa senis i mas kamap long nau taim em i stap inspekta.

Em i tok sampela ol sumatin bilong ol i bin wok gut we ol i go moa long skul bilong ol na mekim Gred 11 long ol skul olsem Bumay-

ong Sekenderi skul, Dregahafen Sekenderi skul na Wawin Nesenel Haiskul long Morobe yet.

“Long dispela as, ol tisa long Siassi na Wasu i mas wok hat long skulim gut ol sumatin,” Merpe i tok.

“Olgeta aua na minit em i mani, olsem na ol i mas wok stret long kisim pe bilong ol. “Taim ol i wok gut ol pikinini tu bai senis long pasin na kisim gut save long stretim sindaun bilong ol.”

Em i tok distrik i gat 19 praimer skul tasol planti taim ol inspekta i no save go raun long sekim ol skul na ol tisa.

Em i tok dispela i wanpela as bilong ol tisa i no wok gut na i lukim tu standet na gret bilong ol sumatin i go daun.

“Nau long dispela nupela yia yu husat tisa i laik stap i mas wok hat na wok gut. Husat tisa i no laik wok hat i mas go aut long sistem nau.”

Merpei bilong ples Gasam long Siassi ailan. Long tupela yia i go pinis em i bin go long yunivesiti bilong Goroka (UOG).

Em i bin tisa moa long 21 krismas na i bin stap het tisa long sampela skul long distrik bipo long divisen i makim em kamap inspekta.

Tisa: Skul bai sasim fi yet

Paul Zuvani i raitim

INAP olsem 2.2 milien sumatin long elementeri, praimer, sekendari na ol teknikel vokesenel skul i statim skul gen bilong dispela yia.

Dispela i bikpela namba na i bihainim tingting bilong gavman long lukim ol manmeri bilong kantri i gat save bilong rit na rait.

Moa yet Gavman i givim mani olsem ol papamama i no ken baim skul fi.

Tasol hevi em Gavman i no save givim mani long taim na i no save givim mani long mani mak ol skul i askim long em.

Dispela i givim hevi long ol skul long wok bilong ol.

Long dispela as sampela skul i tok long sasim fi maski em i oda bilong Gavman long ol skul long no ken mekim olsem.

John Tomokai, het tisa bilong Brahman Sekenderi Skul long Bundi, Madang i tok ol bai sasim ol fi olsem K100 long ol Gred 9 na 10 sumatin na K200 long ol Gred 11 na 12 sumatin.

Em i tok i tru gavman i tok

em bai baim ol skul fi tasol planti taim dispela mani i no save kamap long taim o i no save kamap tru.

Em i tok tiusen fi fri (TFF) mani gavman i givim long leit las yia i bilong las yia i bilong las yia. Em i tok givim mani leit i mekim ol sumatin we i mas yusim dispela mani i abrus long kisim gutpela sevis long mani.

“Mipela bai sasim ol manki long sampela mani,” Tomokai i tok.

“Dispela em bikos mani gavman i givim planti taim i no inap o i no save kamap long mipela.

“Mipela i nidim mani long mekim wok bilong mipela.” Wankain toktok em skul siaman bilong St Ignatius Sekenderi Skul, Aitape long Wes Sepik Fran Evans i tok ol bai sasim fi bikos mani gavman i promis i no save kamap long taim.

Em i tok planti taim ol i harim tok bilong gavman tasol bihain painim hat bikos no gat mani bilong ol long mekim wok.

Long dispela as ol bai sasim fi bilong sapotim wok



Boroko Salvation Army elementeri tisa i redim sampela elementeri sumatin bipo long ol i go long klas. Foto: Paul Zuvani

bilong ol.

Hevi bilong mani i mekim sampela skul i pas bipo long taim bilong ol skul i pas tru.

Tasol Edukesen Minista na Seketeri long dispela wik i tok strong olsem ol skul i no ken sasim wanpela fi o rausim ol sumatin sapos ol i no baim fi.

Edukesen Minista Nick Kuman i tok olgeta skul we i stap aninit long gavman na ol ejensi skul we i save kisim helpim long gavman i no ken sasim fi long ol papamama na skul mangi.

Em i tok olgeta fi maski em skul fi, projek fi o skul lening na tis metiriel fi em ol skul i

no ken sasim wanpela fi.

Em i tok dispela em bikos olgeta dispela fi em tiusen fi fri (TFF) polisi bilong gavman we em i givim K602 milien i karamapim olgeta dispela fi. K75 milien em i givim pinis.

Em i tok Nesenel Eksekutiv Kaunsil (NEC) disisen namba 25 bilong 2016 i stap yet we i tok ol skul i no ken sasim wanpela fi long ol papamama.

“Ol skul bod na edministresen i mas holim na bihainim dispela Nesenel Eksekutiv Kaunsil disisen we em i disisen bilong gavman i traिम long strongim tiusen fi fri polisi,” Kuman i tok.

Papa-mama i mas helpim sumatin

Tony Sapan i raitim

OL i tokim ol papamama na ol lain bilong ol sumatin long Sen Joseph Likambai Elementari skul long Putput 2 olsem ol i namba wan tisa bilong ol pikinini bilong ol em ol i go long skul.

Ol i tokim ol long namba 12 greduesen bilong skul olsem sapos ol i no helpim ol pikinini bilong ol bai i no ken ting bai ol i kamap gut long skul.

Memba bilong Wod 2 insait long Nimamar Rural Lokal Level Gavman Spesel Pepos Autoriti (NRLLGSPA), Mista Paul Miatkiah taim i tok olsem elementeri skul i stat bilong longpela wok-about ol i mas mekim singaut long 22 sumatin long skul gut.

Bruno Junalien makim siaman bilong Edukesen insait long NRLLGSPA i singaut long ol papamama long wok wantaim bilong gutpela bi-

long skul.

Mista Junalien i tokim dispela bung olsem NRLLGSPA bai i putim moa i go long Elementeri edukesen long 2017 bikos em i stat bilong edukesen sistem.

Namba 12 greduesen bilong skul i kamap long taim ol i opim opening bilong nupela dabol klasrum. Kost bilong en i moa long K324 tausen em bai i redi long skul i yusim long stat bilong 2017 skul yia.

PM wetim yet ripot bilong NHC

Aja Potabe i raitim

PRAIM Minista Peter O'Neill i wet yet long wanpela ripot em inap long kisim long opresen bilong National Housing Corporation (NHC).

Mista O'Neill i tok em i bin askim wanpela independen invetigesen tim long mekim wok painim aut long sekim wok bilong NHC.

Em i tok em i bin stopim NHC long rausim ol manmeri husat i stap long haus bilong NHC.

Mista O'Neill i autim dis-

pela toktok long Palamen long las wik taim memba bilong Goroka, Bire Kimisopa, i askim em long wanem samting i kamap long NHC.

“Mi no kisim dispela independen ripot yet. Ol lain bilong mekim ol wok painimaut i wok long mekim wok yet,” Mista O'Neill i tok.

Mista O'Neill i tok Minista bilong Hausing, Paul Ezekiel, bai mekim wanpela ministerial stemen long Palamen long kliaim ol samting.

Mista Kimisopa i tok hevi bilong haus em i wanpela

bikpela samting long kantri.

Em i tok planti manmeri i no gat wanpela gutpela haus long slip.

“Ol pablik sevan i no gat gutpela haus long slip. Olgeta yia gavman i save givim mani long NHC tasol ol i no save mekim sampela nupela samting.

“Ol i no save kirapim nupela haus long helpim pipel bilong yumi. Planti samting i no stap stret long NHC,” Mista Kimisopa i tok.

Mista Kimisopa i bin autim dispela toktok long kwesten taim long Palamen.



PIH Saveman Nius

“I kam long Pacific International Hospital Port Moresby”

Ph: 311 3000 and 799 88000 Website: www.pihpng.com

The Long-term Importance of Milk Teeth in children



Dr Shegufta Mohammad
Dental Consultant
– Pacific International Hospital
MMed, BDS

“No need to take care of milk teeth they will fall off eventually.”

ment tooth has matured and ready to come out inside the oral cavity, simultaneously the root of primary teeth starts to resorb and then the primary teeth show slight to extensive mobility. Then it is noticed and extracted.

keep the bacteria in the oral cavity under control. If you don't remove decay-causing bacteria with daily brushing and flossing, it can lead to cavities or worse, gum disease.

Help keep your child's teeth healthy by using the 2-2-2 rule: visit your dentist TWO times a year, and brush and floss TWO times a day for TWO whole minutes!

Young babies need attention too. Good oral hygiene and a well-balanced diet are good for them. It's good for their teeth and it's good for their overall well being. And good habits start young. So gently clean your baby's gums after every feeding and give your baby healthy foods.

Even though it may be tempting to let your child fall asleep with a baby bottle in their mouth, don't. You may not be able to see any baby teeth in your child's mouth, but they're there. And they're just as susceptible to tooth decay. So letting a baby fall asleep with a bottle full of breast milk, formula, juice or any sweet drink is like soaking those developing teeth in sugar. That wouldn't be good for anyone's teeth, especially your baby's, and it can result in baby bottle tooth decay. Good oral health and diet is pivotal to establishing a lifetime full of happy, healthy smiles. All it takes is brushing, flossing, and eating right. The key is to start those positive habits at an early age.

This is a very common attitude towards milk teeth or primary dentition which is seen all over the world regardless of culture, nationality, and religion. I take this opportunity to make you aware about the immense importance of each milk tooth in the life of children, both in the present and in the future.



Often children being curious manually move primary teeth before their time. In some cases the natural movement is unnoticed and there are cases of retained deciduous (milk tooth). Later permanent tooth appears in oral cavity buccally and lingually which is wrongly positioned and creates panic among parents. Sometimes these malocclusions create cuts and ulcers in the lip and oral tissues. By visiting a dentist you can schedule the extraction in appropriate time and avoid these unfortunate consequences.

According to the Office of the Surgeon General of USA, more than 51 million school hours are lost each year to dental-related conditions. Help prevent lost school days and embrace the 2-2-2 rule, which I shall come to later in this article!

According to the American Dental Hygienists Association, every dollar spent on preventative dental care could save you \$8 (25 kina) to \$50 (159 kina) in restorative and emergency dental treatments and potentially more in additional types of medical treatment. A child should see a paediatric dentist when their first tooth appears, or by his or her first birthday.

A child's oral health can offer clues about his overall health. The problems in your child's mouth can affect the rest of his body. Normally the body's natural defences and good oral hygiene, such as daily brushing and flossing, can



Whenever a child complains about toothache, the parents want to know if it's a milk tooth or not. If it's a permanent tooth they take it more seriously, but milk teeth have their complex functions too.

They make the foundation for the permanent teeth to develop.

They hold up the positions for the permanent teeth to come.

Sometimes the untreated infection may affect the upcoming tooth bud of the succeeding tooth.

Untreated primary teeth and unhealthy gum of young children can lead to severe malocclusion.

The shedding time is very important for every young child. Shedding time is the appropriate time for each primary tooth to fall down. It is a very interesting process as all other complex processes in the human body. When the perma-



Good habits start early. So, establish good oral health by scheduling your child's first dental visit shortly after the first tooth appears and no later than your child's first birthday.

If you have any further queries or seek more information, you may get in touch with the Pacific International Hospital at Ph No. 7998 8000 or email them at info@pihpng.com. Alternatively, you may even visit their new website at www.pihpng.com

KIDNEY STONE EXPERT TO VISIT PIH SOON



OFFERING MORE THAN 20 YEARS OF EXPERIENCE IN THE FIELD OF UROLOGY WITH SPECIAL EXPERTISE IN KIDNEY TRANSPLANTS AND KIDNEY STONES REMOVAL USING ADVANCED TECHNIQUES LIKE LASER LITHOTRIPSY, DR LIONEL GNANARAJ IS AVAILABLE IN PIH FOR CONSULTATIONS SOON.

FREE PRE-SCREENING CHECKS. BY APPOINTMENT ONLY.*

LIMITED SLOTS!
FIRST COME,
FIRST SERVE ONLY!
HURRY
& PRE-BOOK TODAY!

BOOK NOW
CALL US AT
7998 8000
EXT 135



*Terms & Conditions Apply

Wok i kamap long Buka ples balus

OL WOK bilong banisim Buka ples bakus bai i kamap nau. Dispela banis bai stopim ol manmeri long kalapim mak bilong ples balus long mekim kain kain samting long laik bilong ol. Wok bilong banisim ples balus bai i ran inap long 6-pela mun.

Namba tu hap bilong ol wok bai i kamap long senisim haus bilong wetim balus. Olpela haus i bin sanap long 1960 na i kam inap nau ol i bin mekim ol liklik wok tasol long en.

Nesenel Eapot Kopresen (NAC) Sif Operating Opisa, Sylvesta Kenatsi i bin go long hap long sekap long namba wan hap bilong projek na lukim sapos kontrakta i stap

na i kirapim wok pinis.

Kontrakta em i wanpela ausait kampani ol i kolim Kemele konstraksen na bai em i wok wantaim wanpela lokal kampani long dispela projek.

Em i tok bai ol i skruim ranwe bilong ples balus i go moa long 500 mita na ol bikpela balus inap long pun-daan long en.

ABG Teknikel Sevis Sekreteri, Bernard Tzuli i askim ol pipel na ol ples i stap klostu long lukautim dispela projek na larim ol wok i go het long helpim Buk taun na Bogenvil.

Dispela wok long Buka ples balus em i wanpela bikpela projek long kamap long rijon.

RIVIU BILONG WIK

Nupela jas bilong PNG

JASTIS Jeffrey Leonard Shepard bilong Nu Silan i joinim PNG Judisel na Ligo Sevis.

Gavana Jenerel Sir Michael Ogio i tokaut long 3-pela yia kontrak bilong Jastis Sheppard last wik Fraide.

Sif Jastis Sir Salamo Injia i tokaut olsem dispela i bringim namba i go antap long 39 wantaim 4-pela ekt-ing jas. Jastis Injia i tok, apoinmen bilong Jastis Sheppard, Jastis Harold Terrence Foulds husat ol i makim las mun wantaim wanpela nupela jas we ol bai makim klostu taim bai pulimapim 3-pela posisen insait long PNG Judisel na ligo Sevis.

K680 milien bilong nupela kot haus

SIF Jastis Sir Salamo Injia i tokaut olsem konstraksen wok bilong nupela kot haus long Waigani bai stat long mun mas. Namba wan wok bilong nupela wing bai kostim olsem K427 milien we ol i bin sainim pinis pepa las yia.

Sir Injia i tok tu olsem hap mani bilong nupela wing bai i go long stret-im olpela bilding. Gavman projek i

soim olsem nupela bilding bilong kot haus bai pinis long 2018.

Palamen i tok orait long Pablik sevis bil

PALAMEN aste i bin tok orait long Pablik Sevis bil 2016 we bai tok orait long kisim planti sitisen teknikel ed-vaia insait long Pablik sevis

Pablik sevis Minista, Sir Puka Temu i tok, dispela em liklik lo i go long pablik sevis menesmen Ekt 2014.

"Em i taim yumi mas strongim de-velopmen patna long lukluk long ol pipel bilong yumi", Sir Puka Temu i tok.

Bringim iligel gan

Ol pipe bilong Tari, Hela provins i bringim Klostu long 7-pela ai pawa gan na 41 om med gan. Namba wan, wanbel bung i bin kamap long Jenueri 21 long ragbi lik oval long Tari namel long Puzaro Hege Tolene klen na Pujaro Mobe Wena klen i bin givim wanpela. Ol i bin givim tu ol bunara bilong pait.

Hela tas fos komanda PNGDF Liu-tenant Kenel John Manuai i tok

olsem narapela wanbel bung i kamap long Koroba stesen long Fraide Janueri 27 we i lukim ol Puyamu traib i bringim gan bilong ol na namba 3 wanbel bung i kamap long Sarere.

Pablik prosekuta bai pinis wok klostu taim

TOP loya bilong Gavman bilong Papua Niugini Pondros Kaluwin i tokaut olsem em bai pinis wok long mun Novemba 2017 olsem Pablik Prosekuta bilong gavman.

Mista Pondros i tokaut olsem em i gat tingting long kamapim wanpela prosekuta opis insait long Manus provins bipo long em bai pinis wok. Mista Kaluwin i tokaut tu olsem Manus provins i gat bikpela namba bilong bens warent.

Pablik Prosekuta Pondros i tokaut long dispela tingting bilong em long Opening bilong ligo yia long Manus Provins long Tunde 31, Janueri 2017.

Dispela bung i soim kamap bilong residen jas bilong Wewak, Vanimo na Manus lova Geita, Pablik Prosekuta Pondros Kaluwin, Gavana bilong Manus Charlie Benzamin, Taun Meia Ruth Mandrakamu na ol opisa bilong ligo sevis.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg



Graun na divelopmen

SAMPELA yia i go pinis mi bin go raun long kantri Amerika na mi lukim planti tarangu manmeri long strit, long sait bilong ol stua, ausait long ol haus kaikai na aninit long ol bris.

Mi bin sori no gut tru bikos long dispela taim Amerika i bin givim aut ol grin kad long ol manmeri bilong ol arapela kantri husat i laik go stap long Amerika. Taim Amerika i tokaut long wol olsem em i amamas long ol pipel i go stap long Amerika, planti pipel bilong em yet i no gat haus na kaikai na i slip nabaut long ol kona.

Planti yumi i no tingim tasol long taim PNG i wok long redi long kisim independens planti tok lukaut i bin kam olsem PNG i mas was gut long ol hevi bai i kam wantaim divelopmen bilong kantri. Yumi lukim insait long 30 yia bihan long independens, pasin bilong slip long strit na singaut long kaikai i kamap pinis.

Wanpela gutpela samting ol lida husat i bin wokhat long kisim independens i bin mekim, em long larim graun bilong ol pipel i stap long han bilong ol pipel yet. Dispela i mekim na bikpela lain pipel long PNG nau inap stap insait long wok divelopmen bilong kantri. Ol fama i planim kakao, kopi na kaukau na kumu long graun bilong ol yet na mekim mani na lukautim ol yet.

Skelim! Amerika em i ples bilong pipel long olgeta kainkain kantri. Planti pipel bilong ol i lusim asples bilong ol na i no hangamap moa long graun. Ol i painim hat tru long painim kaikai, baim rent na pawa bilong haus olsem na ol i mas go slip ausait. Ol i mas lusim ol famili bilong ol na painim rot long halivim ol yet wan wan.

Tingim! Long liklik wei long PNG olgeta yia planti pipel i save lusim ples na kam long Mosbi na ol arapela siti na taun long painim skul, painim wok o long stap liklik wantaim famili. Sampela dispela pipel i save guria taim ol i harim olsem graun bilong ol i go pinis long han bilong divelopa.

Planti hevi we i pusim ol pipel i go kamap tarangu i save kamap taim ol pipel i no gat graun moa. Antap long graun man o meri husat i hangre inap planim kaikai na lukautim em yet. Antap long graun man o meri i ken mekim haus na stap olsem famili na komyuniti. Graun em i olsem glu em i holim ol pipel i stap olsem famili na komyuniti. Mani i save mekim ol famili i wok resis olsem na bruk pasin i save kamap.

Taim wanpela man o meri i go stap long siti na taun na laip i hat tumas dispela man o meri i ken stap tarangu yet, o go bek long ples na yusim graun bilong ol yet long lukautim ol.

Divelopmen i spit tru na em i hangre long graun. Em i save grisim ol papagraun long sampela mani namba na graun i save lusim ol pipel. Sampela dispela ol divelopmen i save rausim ol pipel long graun na dispela pasin tarangu i no moa hevi bilong taun tasol, em i go insait long ol ples.

Yu bai larim graun bilong yu i go o yu bai painim sampela rot long yusim dispela graun long bringim amamas na gutpela sindaun i kam long yu, famil bilong yu na klen bilong yu?

Kuman: Skul no ken sasim fi

Paul Zuvani i raitim

OLGETA skul we i stap aninit long gavman na ol ejensi skul we i save kisim helpim long gavman i no ken sasim fi long ol papamama na skul pikinini,



Nick Kuman Edukesen Minista.

Edukesen Minista Nick Kuman i tok.

Kuman i tok olgeta fi, maski em skul fi, projek fi o skul lening na tis metiriel fi em ol skul i no ken sasim wanpela fi.

Em i tok dispela em bikos olgeta dispela fi em tuisen fi fri (TFF) polisi bilong gavman em I redim mani bilong karamapim olgeta dispela fi.

Em i tok Nesenel Eksekutiv Kaunsil (NEC) disisen namba 25 bilong 2016 i stap yet we i tok ol skul i no ken sasim wanpela fi long ol papamama.

“Ol skul bod na edministresen i mas holim na bihainim dispela Nesenel Eksekutiv Kaunsil disisen we em i disisen bilong gavman i traime long strongim TFF polisi,” Kuman i tok.

“Sapos ol i no bihainim dispela NEC disisen i min ol skul i

laik brukim dispela gavman daireksen na mi askim Edukesen Dipatmen long ol i mas go aut na lukim olsem ol skul i bihainim dispela tok.

“Ol opisa bilong dipatmen bai mekim wok painim long save long ol skul husat i sasim ol arapela fi arere long TFF mani.

“Moa yet ol skul i no ken holim bek setifiket bilong ol skul pikinibikos dispela i asua na i brukim lo.

“O’Neill/Dion Gavman i putim bikpela mani long edukesen na i traime long holim mani long baset long olgeta skul em i save givim mani stat long 2012.

“Las foapela yia gavman i sapatim gut dispela polisi na i makim pinis mani long 2017 Mani Plen bilong em wantaim K602 milien.”

Kuman i tok Tresari Dipatmen bai putim TFF mani klostu taim long tupela hap na bai givim mani long Benkov PNG we em bai skelim mani i go long ol benk bihainim we akaun bilong wan wan skul i stap.

Em i tok maski ol gavman bipo i traime long kamapim dispela polisi tasol no gat inap long taim we dispela gavman i kamap na i kamapim na i lukim kaikai bilong dispela polisi.

Moa long dispela polisi i lukim moa meri i go long skul, ol pikinini lain gut, kwaliti bilong edukesen i kamap strong na gutpela tisa na lening metiriel i go long ol skul.

Tok bilong gavman i stap, ol skul i no ken sasim ol papamama na ol skul pikinilong wanpela fi.

Helt woka kisim trening long daunim kensa

Siapea Loutova i raitim

MEDIKAL ripot long Nesenel Dipatmen ov Helt i soim olsem moa long 700 meri long PNG i save dai long wanwan yia long taim ol i save kisim sevikel (cervical) kensa.

Dispela em ol namba i kamap long medikel ripot, tasol ol namba em ol i no mekim ripot long en, em i stap tu, tasol long nau yet husat bai save long dispela ol namba.

Dispela bikpela namba bilong sevikel kensa i mekim na Isten Hailans Provinsel gavman, aninit long lidasip bilong Gavana Julie Soso i putim mani mak inap long K600,000 na em i givim long Isten Hailans Provinsal Helt Atoriti (EHPHA) long baim 10-pela kensa masin na wanpela ten sita kar we bai wokim ol raun na sekim ol helt senta long 8-pela distrik na kamapim tu ol trenning program long skulim na lainim ol helt woka long kisim gut save bilong pait na daunim sik kensa long ol mama long provins.

Ekting Sif Eksekutiv Opisa bilong EHPHA Dokta Max Manape long taim em i opim wanpela wan wik trening wok-sop bilong sik kensa long las wik i tok, lukluk long namba bilong ol meri husat i wok long i dai long sik kensa em i wok long kamap bikpela tru long provins na kantri tu.

“Taim Gavana Soso i kisim dispela ol ripot bilong ol kensa long yia i go pinis, em i mekim tok promis long sapatim EHPHA na ol helt woka long kamapim sampela gutpela samting long traime na daunim sik kensa.

Dispela tok promis i no popaia bikos Gavana Soso i givim mani long karim aut wok



Ol bosman bilong EHPHA, tupela trena bilong Taiwan na ol helt woka husat i bin kamap long Kefamok Konprens senta long Goroka long kisim trening long wok bilong daunim kensa long Isten Hailans. Foto: Loutova Siapea

long traime long daunim dispela sik we i wok long bringim bikpela hevi na kisim tu laip bilong planti ol meri long provins. Olsem na taim EHPHA i kisim dispela ol mani, em i yusim gut long baim ol kensa masin wantaim kar na kamapim tu ol trening program bilong sik kensa. Ol lain husat i kamap na kisim trening i kam yet long 8-pela distrik long provins.

Na taim ol i lainim na kisim save long dispela trening wok-sop, ol i ken i go bek na skruim trening i go long ol helt woka long wan wan distrik bilong ol,” Dokta Manape i tok.

Em i tok ol masin we EHPHA i baim em i no bilong oraitim na pinisim sik kensa. Em bilong helpim ol meri long glasim na lukim ol sapos ol i gat sik kensa o no gat.

Long dispela 10-pela kensa masin, tupela em bikpela Goroka Provinsal haus sik bai yusim na 7-pela bai i go long wan wan helt senta long ol distrik olsem Obura/Wanenara, Kainantu, Henganofi, Lufa, Okapa, Unggai/Bena na



Em i taim bilong amamas na selebren long taim Margaret Guandiwi husat em kodineta bilong Famili Helt Asosiesen i kisim setifiket em Profesa Glen Mola i givim bihain long em i bin pinisim wan wik trening wok-sop bilong daunim sik kensa long Isten Hailans. Foto: Loutova Siapea

Daulo distrik.

Dokta Manape i tok amamas long Gavana Soso na gavman bilong em long provins long luksave na kamap wantaim dispela mani long helpim ol mama.

“Na sapos Gavana Soso i ken tingim ol meri long provins na kamap wantaim ol mani long helpim ol long ol sik kensa,

olsem wanem long ol lokal memba na MP bilong ol 8-pela distrik long provins?” Dokta Manape i askim.

Em i tok sapos ol lida bilong 8-pela distrik long provins i ken wok bung long helpim na toktok long dispela hevi bilong sik kensa long provins, ating planti ol meri bai i ken abrusim dispela sik.

Ges kampani painim rot long daunim kos



Gereia Aopi, presiden bilong PNG Samba ov Mains na Petroleum. Foto: Wantok

Hevi bilong mani mekim NASFUND putim was: Tarutia

Paul Zuvani i raitim

SUPAENUESEN (NASFUND) kampani i go het long givim ol gutpela win mani long ol memba bilong em, Sif Eksekutiv Opisa lan Tarutia i tok.

Tasol wari bilong mani long dispela taim wantaim hevi bilong foren eksens na sot bilong wok i min oganaisesen i mas mekim ol gutpela disisen hariap.

NASFUND i wanpela long ol ol tupela bikpela supanesen fan, we i givim sevis long hap milien memba na menesim moa long K4 bilien mani.

Wantaim 88 pesen bilong ol fan ol i investim insait long kantri, dispela i wanpela long ol bikpela PNG investa insait long kantri.

Tarutia i tok ol kain samt- ing bilong fan i planti na oganaisesen i mekim ol samt- ing long bungim mani plen bilong em.

Em i tokim Bisnis Edventis olsem: "Mipela i gat ol gutpela hap we i tok—dispela em ol samt- ing we mipela inves- ta dispela ol samt- ing mipela i lukluk long kisim win mani.

"Long ol kain samt- ing

olsem stretim pe, sea, lon, na ol narapela samt- ing. I bin gat ol gutpela disisen mipela i mekim long wan wan hap mipela i mekim invesmen long em.

"Samting mipela i mekim em long noken kamapim ol wok we win mani bilong ol i liklik na i mas putim mani long ol hap we wanpela inap mekim gut mani.

"Dispela em long sait bilong invesmen. Long sait bilong karimaut wok, bikpela samt- ing em mipela i mas go het long mekim ol wok long baim ol memba bilong mipela long supanesen taitel long wanem taim ol win mani bilong ol i redi.

"Mipela i kamapim tu ol nupela sistem long mekim gut wok, long we mipela i save mekim ol wok olsem long taim mi lusim wok o wanpela bikpela opisa i kamapim i no bruk daun.

"Dispela i wanpela hatpela taim long gro bilong bisnis o long kamapim wok bikos long hevi bilong mani.

"I no gat wapela nupela na bikpela invesmen arere long wanem ol wok gavman i bin mekim.

Lagatoi Siti bai kamapim moa bisnis

BISNIS bai kamap bikpela na moa investmen bai kam insait long kantri taim Kumul Consolidated Holdings (KCH) Limited i senisim Pot Mosbi siti.

Plen bilong kamapim nupela Lagatoi Siti i kamap pinis na KCH i muvim sip bris i go long Motukea Ailan.

KCH i bin yusim K60 milien long kamapim disain bilong dispela nupela siti, Minista bilong Pablik Entaprais na Stet Investmen, William

Duma, i tok.

Mista Duma i tok KCH i bin kisim K900 milien dinau mani long baim Motukea Ailan long Curtain Brothers.

Banks South Pacific, ANZ and Westpac i bin givim dispela dinau mani long KCH.

KCH bai muvim Lancron Neval Beis i go long Manu- manu bikos dispela ples bai kamap Lagatoi Siti.

Mista Duma i mekim dispela toktok long Palamen long Trinde long dispela wik.

Paul Zuvani i raitim

HEVI bilong mani i mekim ol ges kampani olsem Exxon Mobil na Total i painim we long mekim wok bilong daunim kos, presiden bilong PNG Samba ov Mains na Petroleum, Gereia Aopi i tok.

Em i tok prais bilong wel na ges long dispela taim i stap daunbilo na dispela i mekim ol kampani long tingting gut long we ol i mekim wok.

Em i mekim dispela tok long taim Total i redi long developim Papua LNG projek long Galf provins.

Em i tokim Bisnis Edventis olsem long hat taim i gutpela long ol kampani i serim wok.

"Sapos yu lukluk long PNG LNG projek na Papua LNG

projek, yu gat gutpela bikpela projek na em i bikpela samt- ing long PNG olsem tupela i wok bung na serim hevi.

"Long dispela Total i ken rausim ges long graun na Exxon Mobil i tanim ges long fektori.

"Dispela i gutpela long olgeta stekholda na moa yet long gavman."

Tasol hevi nau em olsem tupela kampani mas traim long wok bung wantaim.

Aopi i tok las tupela yia i bin hatpela yia long planti ol risos kampani.

Em i tok dispela hevi i stap yet tasol i gat bilip i stap olsem bai gat gutpela taim i kam lbihain taim.

"Yu mas lukluk long ol rot bilong skelim kos. Mipela ol-

geta i bungim hevi bilong prais bilong wel na i painim ol rot bilong daun kos.

"Long ol taim nogut yumi mas helpim wanpela na narapela.

"Mipela i lukluk tu long painim rot long mekim ol wok long daunim kos."

Aopi i tok wok bilong skelim royalti bilong ol projek em ol i wanbel long bikpela level we gavman i toktok tu long mekim ol agrimen.

"Dispela i gutpela tasol hevi em long rot bilong serim dispela ol royalti namel long ol wanwan papagraun klen na famili."

Em i tok taim sampela papagraun i no wanbel ol i ken go long kot na kisim oda long pasim peimen bilong

dispela ol royalti na dispela bai mekim hat long ol narapela manmeri i kisim pe, maski mani bilong ol i stap long Sentral Benk.

"Taim yu lukluk long ol ges projek yu no lukluk long 10 i go long 15 yia tasol lukluk long 30 o moa krismas.

"Long dispela as yu mas kamapim gutpela poroman pasin wantaim olgeta stekholda.

"Dispela i olsem marit; manmeri i marit, wokbung na helpim tupela yet.

"Dispela i hat tasol yu mas strongim kain poroman pasin.

"Bikpela samt- ing em long skulim olgeta lain, yangpela na lapun wantaim bai ol i ken save rot gavman na kampani i save mekim wok.

Milen Be abrusim sans long bisnis

GAVANA bilong Milen Ben, Titus Philemon, i tok ol bikpela sip bilong ovasis i wok long yusim Joma Pasis long Milen Be tasol ol asples i no gat sans long mekim bisnis na kisim sampela kain benefit.

Mista Philemon i tok Jomas Pasis i kamap rot bilong ol bikpela sip bilong Australia na Nu Silan long karim ol bikpela kago i go kam long Not Amerika na Esia.

Em i tok Intenesenel Maritaim Ogenisesen (IMO) i luksave long dispela rot we ol sip i wok long yusim.

"Ol sip i karim bikpela

kago i go kam long ovasis long dispela pasis. Ol pipel bilong mi long Woodlark Ailan tu i save go kam long moto kanu long dispela pasis na laip na sefti bilong ol i no stap gut.

"Mi laikim gavman long luksave long dispela na mipela i ken kisim sampela benefit long dispela pasis," Mista Philemon i tok.

Em i askim Prais Minista Peter O'Neill sapos gavman i ken mekim sampela samt- ing long larim ol manmeri long Milen Be i kisim benefit long dispela pasis.

"Mi laikim gavman long

makim wanpela mausman bilong PNG i stap long IMO. Em i ken stretim toktok wantaim ol papa bilong ol bikpela sip husat i save yusim dispela rot long givim mipela sampela sans long mekim bisnis," Mista Philemon i tok.

Mista Philemon i mekim dispela toktok long Palamen long dispela wik Tunde.

Prais Minista Peter O'Neill i tok gavman bai senisim lo bilong marin transpot.

"Gavman bai toktok wantaim PNG Ports Corporation na lukim sapos yumi ken wokim wanpela bikpela sip

bris long Woodlark Ailan.

"I gat sans long putim rif pailot na ol liklik bot tu long eskotim ol bikpela kago sip," Mista O'Neill i tok.

Mista O'Neill i tok gavman bai mekim olgeta samt- ing long putim intres bilong pipel i go pas.

"Dipatmen ov Transpot na PNG Ports Corporation bai wok wantaim long lukluk i go insait long dispela.

"Dispela pasis i kamapim gutpela sans long yumi kirapim ples na givim sans long ol pipel i ken mekim bisnis na senisim laip," me i tok.

Minista: Bai mipela pinisim Vanimu ples balus

Aja Potabe i raitim

GAVMAN i luksave olsem Vanimu ples balus long Wes Sepik em i wanpela bikpela ples balus insait long kantri, Minista bilong Sivil Aviesen, Davis Steven, i tokim Palamen.

Mista Steven i tok em i no wanbel long kontrakta we gavman i bin givim kontrak long em long mekim ol mentenens wok long stretim gen dispela ples balus.

Mista Steven i tok dispela kontrakta i no pinisim wok bikos gavman i sot long mani na i no givim olgeta mani long pinisim wok mentenens bilong ples balus.

"Sampela taim mipela i

save givim kontrak long ol lokal kontrakta tasol ol i no save pinisim gut wok long taim stret.

"Mi no wanbel long dispela kontrakta husat i bin mekim mentenens wok. Taim gavman mani i pinis, mipela tokim em long yusim mani bilong em yet na pinisim kontrak.

"Mipela i save olsem gavman bai givim yet mani bilong em. Tasol ol i karim ol masin na ol samt- ing bilong ol na i go," Mista Steven i tok.

Em i tok Treseri Dipatmen i prinim ol sek na ol bai givim dispela mani i go long kontrakta long pinisim wok.

"Mipela i baim K46 milien pinis. Wok i no pinis yet.

Tasol bai mi mekim olgeta samt- ing long larim wok i pinis bikos dispela ples balus em i wanpela namba wan ples balus bilong yumi long kantri," Mista Steven i tok.

Em i bin mekim dispela toktok long Palamen long Tunde long dispela wik taim Gavana bilong Wes Sepik, Amkat Mai, i askim em sapos gavman bai pinisim dispela mentenens wok bilong ples balus.

Mista Mai i tok teminal bilding, pak bilong balus, na nait lait bilong ranwe bilong dispela ples balus i no stap yet.

"Mi laik askim sapos gavman i ken hariapim fanding bilong dispela wok na larim

Vanimu ples balus i kamap wanpela bikpela ples balus," Mista Mai i tok.

Em i tok Vanimu em i wapela boda taun na dispela ples balus i ken bringim planti gutpela samt- ing.

"Ol PNG Difens Fos i save yusim dispela ples balus. Yumi ken mekim dispela ples balus i kamap wanpela bikpela ples balus long bringim ol intenesenel pasindia olsem turis na bisnis manmeri i kam.

"Gavman i mas luksave long dispela gutpela samt- ing Vanimu ples balus i ken bringim long givim sevis long pipel na strongim ikononi bilong kantri," Mista Mai i tok.

Hatwok karim kaikai

Shirley Gari i raitim
UPNG Jenelism Sumatin

TABITHA Levi em i mama bilong 4-pela pikinini na em i bilong Matupit Ailan long Is Nu Briten Provins. Em i wanpela mama husat i save wok hat tru long maket na lukautim famili bilong em.

Tabitha Levi i tok olsem pasin bilong maket i stat bihain long taim Rabaul volkeno i pairap long 1994 na em i ranawe wantaim famili bilong em i go longwe.

Em i stap wantaim famili bilong em long Tomaringa long 1997 bihain em i kam long Pot Mosbi long 2000.

“Namba wan Kampani mi bin wok wantaim em NEGESO taim mi kam long Pot Mosbi, tasol mi lusim bikos mi no amamas wantaim pe mi bin kisim.

“Mi bin stap nating long sampela mun tasol bihain mi skelim olsem mi mas maket na sapatim man bilong mi na helpim famili bilong mi. Long dispela taim,

man bilong mi i wok long UPNG transpot dipatmen olsem ekting menesa. Nem bilong en, Tamti Levi.

“Mi gat 4-pela pikinini husat i stap long skul na i gat ol samting we ol i laikim insait long laip bilong ol. Yumi olgeta i save olsem stap insait long Citi wantaim papa tasol wok em i hat tumas na i save nidim planti mani olsem na long 2001 mi staim lik lik bisnis bilong salim pinat.”

“Mi stat long baim wanpela 50kg beg pinat long ol Hailans husat i save kam long Lae na Mt Hagen. Mi save pekim long ol lik lik plastik ken na salim long ol opis o maket. Taim mi lukim olsem maket bilong pinat i save pinis hariap tru, mi stat baim 10-pela bek pinat. Mi save kisim K600 -K800 long wan wan bek. Dispela pinat bisnis i bin stop long 2014 taim mi lukim olsem i gat diman long ol kuk kaikai,” Tabitha i tok.

Long 2005, Taitha i bin kukim rais bol na salim long

Waigani Praimeri skul. Rais bol em i wanpela kaikai i no dia tumas. Em i gat abus na kumu insait long em. Bel bilong yu i ken pulap long wanpela rais bol tasol sapos rais bol swit, “Olsem yu yet?” kisim long laik bilong yu.

“Mi save kukim 25kg rais long wan wan de long Mande inap long Fraide. Mi save kirap long bik moning long 3am na kukim rais na 5am mi save stat praim rais bol,” Taitha i tok.

“Mi save kisim gutpela mani mak olsem K1000 plas long wanpela de. Tasol mi bin sori tru bikos dispela bisnis i bin stop bihain long wanpela yia tasol bikos ol narapela meri i bin gat jeles tingting long mi olsem na mi stop long kukim rais bol. Mi save maket rais bol, banana kek wantaim drinks.

“Long ol mani mi save kisim, mi save baim kaikai bilong famili bilong mi na bikpela long dispela em long baim skul fi bilong ol pikinini bilong mi husat i bin stap



Tabitha Levi long lephan, man bilong Tabitha – Tamti Levi long baksait na susa bilong Tabitha. Poto: Nicky Bernard.

long ol bikpela skul bipo.

“Mi tok tenkyu long papa God olsem pikinini man bilong mi i greduet las yia 2016 long Pasifik Edventis Yuni-vesiti (PAU) wantaim degri long bisnis na Edukesen. Dispela em i rausim hevi antap long mi,” Tabitha i tok.

Mi no bin givap taim mi bungim ol salens insait long liklik bisnis, mi strongim sait bilong mi yet i go.

Man bilong mi na famili save sapatim mi gut tru na nau mi gat wanpela liklik spes we mi save maket aigir na sof dring long Waigani Rumana opis. Taim mi pinis, mi save i go long Godons maket na baim nupela kumu, kaukau bilong kuk long neks de. Dispela em ol nomel wok mi save mekim long olgeta wik. Sampela taim mi les long kuk mi save

malolo bikos mi no wari tumas nau, bikpela wari bilong mi em pinis long skul fi bilong ol pikinini bilong mi,” Tabitha i tok.

Tabitha i tok strongim ol meri husat i save stap nating long no ken sindaun nating na wetim potnait bilong man. Ol meri mas sanap strong, sanap long lek na traim maket na lukautim famili.

Wewak maket - Ples bilong painim ol Sepik basket na bilum



Mama ya i lainim ol baset na taim em i wetim kastoma, han bilong em i bisi long wokim nupela basket.



Ol dispela basket i hanmak bilong ol Sepik wara. Susa ya i lainim ol basket long Wewak maket.



Long taim dispela liklik meri i wetim ol kastoma, em i wok long tanim rop long wokim nupela Wosera bilum.

WEWAK taun maket i save bisi tru long ol mama i kam long olgeta kona bilong provins long salim ol gaden kaikai, abus bilong bus na wara, ol klos laplap na ol kain samting olsem ol bilum, basket na bilas bilong singsing. I gat wan wan seksen bilong salim ol dispela kain samting long maket. Sapos spes i pulap bai ol i lainim ol samting long simen insait long maket. Long las haus insait long maket bai yu painim ol mama i sindaun salim ol kalakala Sepik basket na Wosera bilum na ol arapela bilas samting. Planti ol lokal turis na ol visita tu i save pulim lain i go long baim ol dispela hanmak bilong Sepik.

Ol poto na stori – Anna Solomon

Kabe Sande Skul sapatim sios

Paulus Tali i raitim

SIASSI Kabe Sande Skul, Morobe i givim K350 long Evangelikal Luteran Sios (ELC) PNG Nesenel Sande Skul program.

Dispela i namba wan ofa we ol tisa na hetman bilong skul i laik laik Sande Skul i mas ran gut.

Tresera na waspapa bilong sande skul Andrew Tailo na Tom Geseng i kisim nem bilong ol Sande Skul pikinini na bringim ofa i go long ELC PNG het opis long Ampo, Lae.

Dispela i bihainim wanpela spesel wokabaut bilong sande skul long Siassi Ailan.

Tupela lidaman i tok planti

taim ofa bilong sande skul we ol i save givim long distrik konprensi i no save go long nesenel Sande Skul program na olsem tupela yet i kamap na givim long han stret bilong ol bosman.

"Mipela Kristen i no save harim ripot bilong wan wan divisen bilong wok ministri insait long kongrigesen na paris, olsem na hetman bilong Sande skul yet i givim ofa bilong mipela i go long nesenel sande skul program," Tailo na Geseng i tok.

Tupela i tok kamap bilong tupela long het opis i bilong soim ofa ol i gat long sapatim na strongim wok bilong Sande skul long ailan.

Nesenel Sande Skul

kodineta Reveren Gembube Wongege i tok tenkyu na amamas long kamap bilong tupela lidaman.

Em i tok em i tru planti taim ol distrik konprensi i kamapim ripot bilong Sande Skul na dispela i save kamap ples klia.

"Mi olsem nesenel kodineta bilong Sande Skul mi amamas long tok yu tupela i mekim long soim olsem Siassi distrik Sande skul program i no bin kamap olsem na Kabe Kongrigesen i soim gutpela piksa bilong Sande Skul wok long pasin bilong givim ofa," Wongege i tok.

"Dispela i gutpela piksa bilong stretpela pasin bilong givim samting long God i go long wok bilong sios."

Pater blesim skul pikinini



Sampela ol sios pikinini bung wantaim ol papamama i lotu long Kristen Apostolik Felosip long Hohola, Pot Mosbi. Foto: Paul Zuvani

Paul Zuvani i raitim

PATER Emmanuel Koro, MSC, Katolik saplin long Murray Barracks, Pot Mosbi i bin blesim ol skul pikinini long Murray Barracks long las Sande.

Em i bin mekim olsem long taim ol skul sumatin i laik statim skul bilong ol long dispela wik.

Em i bin askim ol skul pikinini long go long fran na sanap long lain olsem em i ken blesim ol.

Em i tok ol pikinini olsem pastaim long ol i skul gut ol i mas harim tok bilong papamama.

"Mi mas save yupela i save harim papamama long mekim ol wok o nogat?," Fr Emmanuel i tok.

"Harim ol papamama na bihainim tok i bikpela samting bipo long yu ken go long skul.

"Dispela i namba foa lo bilong God na olsem em i bikpela tok."

Tasol em i salensim ol papamama olsem em i wok bilong ol long skulim gut ol pikinini tu.

Em i tok ol papamama i no ken wet o larim long ol skul na tisa long skulim ol pikinini long wei bilong stap.

"Yupela ol papamama i mas mekim wok bilong yupela long lainim ol pikinini long gutpela pasin tu.

"Yupela olsem papamama i namba wan tisa bilong pikinini.

"Yupela i no ken lusim long han bilong ol tisa long lain. Sampela taim ol tisa i no inap long lainim ol long olgeta gutpela samting ol i mas lainim long em," em i tok.

Long dispela taim planti papamama wantaim ol skul pikinini na tisa i kamap long misa.

Ol i amamas olsem pater i blesim pikinini bilong ol.

Wanpela papa Anton Meaia i tok em i gutpela long ol pikinini i kisim blesing bipo long ol i statim skul.

"Mi kisim pikinini bilong mi i kam lotu na amamas long pater i blesim em wantaim ol arapela pikinini," em i tok.

"Em bikpela samting long kisim blesing bilong Bikpela. Nau i taim bilong pikinini long em i mas wok hat na lain gut."

Narapela mama Agatha Sabaia i tok em i save traim hat long skulim pikinini meri bilong em long haus long lain gut.

Tasol i bilip wantaim blessing bilong pater, pikinini bilong em bai lain gut wantaim grasia bilong Bikpela.

Tupela skul pikinini i skul long Ted Diro Pramerit Skul insait long Murray Barracks.

SOCAY askim long gutpela luksave



Sampela ol nupela sumatin husat i sindaun long entrens eksam long kisim ples long Help Our Children And Youth skul. Foto: Paul Zuvani

Paul Zuvani i raitim

HELP Our Children and Youth (SOCAY) i laikim gutpela luksave na sapatim long atoriti, Deputi prinsipal bilong skul Linsen Dope i tok.

Dope i tokim Wantok olsem inap long 10-pela yia nau skul i bin sapatim komyuniti long bringim ol yangpela long stap gut long laip tasol i no kisim gutpela luksave long Katolik Edukesen opis o Edukesen Dipatmen long sait bilong mani.

Em i tok skul i trenim ol tarangu mangi husat planti i stap long strit wantaim ol laip skil kos olsem wok didiman, plaming na kapentri we i go anit long Integral Humen Developmen.

Moa yet skul i trenim ol mangi long ol kos olsem bisnis stadi, maketing, hospitaliti na turisim tu.

Dope i tok planti bilong ol mangi nau i wok olsem akuanten, tisa, didiman opisa, plama na kapenta.

SOCAY i stap long Hohola, Pot Mosbi na i kamap bihainim tingting bilong ol Sacred Heart Brothers, Katolik Sios long helpim ol yangpela husat planti bilong ol i no gat gutpela sindaun na i save stap long strit.

Dispela skul em Ludwina Soari Bogege husat i prinsipal i go pas long em long dispela taim.

Tasol Bogege i no stap na Dope i kisim ples bilong em na i tok skul i kamap bihainim as tingting bilong leit Pater William (Bill) Leibert, SVD, husat i kamapim ol Bois Taun Senta (haus kalabus bilong ol yangpela) long Wewak, Is Sepik; Erap long Markham long Morobe na Hohola long Mosbi.

Em i tok leit Fr Bill i lukim olsem taim ol yangpela i kam ausait long ol senta ol i no save painim wok we ol i go bek long hat laip we ol i bin stap long em.

"Mipela i askim olsem sampela gutpela luksave i mas

kam long mipela," em i tok.

"Ol tisa i no kisim pe tasol i givim taim bilong ol yet long skulim ol mangi.

"Dispela mipela i amamas tasol ol i man na i gat nid long laip olsem baim kaikai, bas fe, skul fi na ol arapela samting long laip.

"Mipela i askim sapos Katolik Edukesen Opis inap baim ol tisa o Edukesen Dipatmen i ken givim pe long mipela tu."

Dope i tok stat long 2010 skul i gat ol klas long Gret 7 i go inap long Gret 10.

Em i tok ol sumatin i sindaun long fainel Gret 8 na Gret 10 eksaminesen we sampela i mekim gut i save go long ol orait gut olsem Hohola Yut Senta, De La Salle Bomana, Don Bosco, Gerehu na Kila Kila Sekendari.

Tasol em i tok sapos ol sumatin i mekim Gret 7 na i mekim gut ol i ken aplai na go long ol nomel skul long eduksen sistem.

Skul fi em K800 long wanpela yia.

Biliau man kamap sios memba

Paulus Tali i raitim

INAP olsem 19-pela yangpela long Biliau Kompaun long Malahang, Lae, Morobe i kisim konfemesen long kisim strong na soim ol olsem ol i memba bilong Luteran Sios.

Ol i kisim dispela mak bihain long ol i pinisim wanpela yia bilong skul.

Paris pasta Zawie Sandrie i amamas long ol yangpela na i tok ol nau i kamap strong na i ken go na tokaut long tok bilong Bikpela wantaim strong bilong em.

Em i tok Bikpela i save helpim ol manmeri husat i save givim laip bilong ol tru long em.

Em i tok bipo long ol i

kisim dispela mak ol i bin soim tru olsem ol i sori long asua bilong ol na i laik bihainim skul bilong Bikpela long laip bilong ol.

Pasta Sandrie i tok em i gat bilip long dispela ol yangpela long go aut na autim tok na long soim pasin Luteran namel long ol wan lotu na ol arapela Kristen bratasusa.

Long bihainim Rom 1:16 em i tok, "Mi gat olgeta bilip long Gutnius na long pawa bilong God long sevim laip," olsem ol yangpela nau i ken wok wantaim strong bilong Bikpela.

Lo na oda siaman bilong Aih, Joe Ali i tok em i amamas long pikinini bilong em

i skul na kisim dispela mak long sios.

Em i tok em i bin painim hat long skulim pikinini bilong em tasol taim pikinini bilong em i harim tok na kisim Jisas long laip bilong em, Bikpela yet i strongim pikinini bilong em.

"Planti taim ol manmeri na moa yet ol papamama i ting ol inap long senisim man tasol Bikpela wanpela inap long senisim gut man," Ali i tok.

Em i tok stap long hap we manmeri bilong planti hap i stap i save hat long ol papamama i stretim ol pikinini.

Tasol em i tok gutpela samting em olsem planti lain long Biliau Kompaun em ol lain Luteran.

Stretim gaset na posisen bilong ol tisa hariap

SKUL i stat gen long dispela wik. Tasol long taim ol pikinini i go bek skul planti i painimaut olsem ol tisa i sot. Long wanpela sios ejensi skul long NCD, ol i sot long 8-pela tisa. I no gat het tisa tu bikos ol lain i lukautim dispela wok long NCD i bin slek long stretim olgeta samting las yia. Dispela em wanpela eksampel tasol bikos olgeta skul insait long kantri i pilim dispela pen bilong ol tisa i sot long taim skul i stat. Na dispela em i asua bilong husat?

Long Palamen long dispela wik, yumi harim olsem ol tisa i sot bikos Edukesen Dipatmen na Tisa Sevis Komisnin wantaim ol lain bilong Provinsal Edukesen i no bin advetais long ol posisen bilong ol tisa long 2015 na 2016. Minista bilong Edukesen i tokim Palamen olsem i no gat mani olsem na ol i no bin advetais ol posisen long 2015 na 2016. Em i tok ol provins i mas sekap namel long Jun na Julai na tok save long wanem ol posisen i stap nating, orait bihain long dispela bai i gat gaset i kamap wantaim ol posisen na ol tisa i ken aplai.

I gat tupela as bilong tok, i no bin gat mani long advetais long ol posisen bilong ol tisa na ol provins i no givim ripot bilong hamas tisa i sot long ol skul. Watpo na i no gat mani na i no gat ol nem? Dipatmen bilong



Edukesen em i wanpela dipatmen i lukautim bikpela namba bilong ol wokman na meri insait long kantri. Em i lukautim planti tausen ol skul pikinini. Namba wan wok bilong en em long givim kwaliti edukesen long ol pikinini bilong yumi. Tasol i luk olsem em

i feil long mekim dispela namba wan wok bilong en.

Sapos PNG i tok tru long givim fri edukesen i go long ol pikinini, orait i mas gat gutpela kwaliti tisa tu i redi long skulim ol pikinini. I mas gat gutpela plen na ol gutpela wokmanmeri i bihainim plen

na sekap oltaim long ol skul na salim ripot long hamas tisa i sot long wan wan skul insait long provins.

I mas gat mani i stap tu long kamapim gaset wantaim infomesen bilong ol posisen na gaset i mas kamap bipo long ol skul i pas

olsem bai ol tisa i lukim na aplai long kism wok.

Edukesen Seketeri i gat bikpela wok long lukim olsem ol opisa bilong dipatmen i mekim stret wok bilong ol long stretim gaset na posisen bilong ol tisa long wan wan skul insait long kantri. I luk olsem bikpela taim na mani bilong dipatmen i wok long lus long toktok long dispela TFF polisi bilong gavman na wanem kain mekim-save ol skul bai kism sapos ol i sasim fi.

I gutpela sapos Seketeri bilong Edukesen na Tisa Sevis Komisnin i ken givim moa taim tu wantaim mani tu long printim gaset na putim posisen bilong ol tisa hariap na bai ol skul i ken kism inap tisa long skulim ol pikinini. Dispela TFF o fri edukesen em i ajenda bilong ol politisen na gavman bilong tude. Ol tisa na edukesen bilong ol pikinini em i namba wan prairiti bilong Edukesen Dipatmen, olsem na Seketeri i mas lukluk long dispela eria wantaim Tisa Sevis Komisnin na stretim hariap.

Nogut yumi lukluk tasol long TFF polisi na ol klasrum i pulap nating long ol sumatin tasol i no gat inap tisa long skulim ol. Sapos yumi slek bai yumi bagarapim edukesen bilong ol pikinini na kantri bai i no inap long lukim gutpela kaikai bilong dispela TFF polisi bilong gavman.

Olsem wanem mi save long God? Painimaut

OLSEM wanem mi save long God? Dispela i bikpela na hatpela askim long bekim isi?

Tumbuna bilong mipela i no save olsem i gat wanpela God husat i mekim heven (ples bilong spirit) na graun.

Tasol ol i gat bilip long ol masalai, ol spirit, we ol i bilip i stap long wan wan hap. Ol i bilip long masalai bilong maunten, basis, solwara o wara, ston o diwai.

Ol i bilip olsem sapos yu nupela na raun long ol hap we dispela ol samting i stap bai ol i paulim yu.

Olsem mipela i ken tok Papua Niugini i nogat bilip long wanpela God tasol i bilip long planti spirit we mipela i ken tok ol i god.

Spirit bilong ol man i dai tu em ol man i no save we ol i go tasol ol i save spirit bilong dai man i stap long sampela hap.

Long painim moa ansa bilong dispela askim sampela saveman i mekim tupela



askim long bekim dispela bikpela askim. Ol i askim— Mi (manmeri) save dai na mi bilip long God o bikos mi bilip long God mi save mi bai dai?

Long dispela wanpela save-man bilong kantri Frans, Frans de Waal i tok ansa i stap long namba tu bekim.

Frans i tok em bilip long God em i save em bai dai.

Em i tok laikim bilong stap long sampela kain oda i mekim ol manmeri i kamap wantaim tingting bilong bilip long spirit.

Tasol planti ol relijen lida olsem Katolik, Luteran, Anglikan, Yunaitet, SDA o Pen-

tekostel sios i tok narakain. Ol i tok bikos God i stap na mipela i ken save wanem samting i rait na wanem samting i rong na bilip long bihain taim bilong dai.

Tasol profesa Frans i no lotu man o man i bilip long God. Em long tok Inglis i tok em i etis, i no man bilong bilip long God. Em i save tasol long wok bilong saiens.

Long dispela em i tok man i wanpela enimal o abus tasol i gat pasin bilong skelim tingting na olsem em i antap long ol arapela abus.

Em i tok ol arapela abus we i klostu wankain olsem man em manki.

Em i tok ol manki i save sori long wanpela taim narapela i bagarapim em o sapos ol i mekim samting narapela i no ken lus long wanem samting ol arapela i mekim.

Long dispela as Frans i tok ol manki i gat sampela kain tingting long save wanem

samting i rait na wanem samting i rong.

Em i go het long tok sapos dispela i olsem orait ol i gat wankain tingting olsem man.

Man tu i gat tingting long save sapos wanpela i kism bagarap o nogat na i gat pasin bilong sori na i gat save long skelim tingting long rong na rait.

Long dispela as em i tok i no bikos long God na mipela i save wanem samting i rait na rong tasol dispela save i stap long mipela yet.

Em i tok ol eip, bikpela manki, i save pilim sem sapos ol i save samting ol i mekim i rong.

Long dispela as Frans i tok mi save long skelim tingting bipo long mi save long God na i no bikos long God na mi save long skelim tingting.

Long ol Kristen ol bai tok bikos long God na ol i save long ol samting na save long God tu.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Lagatoi Siti muvim Lancron Neval Beis

Aja Potabe i raitim

KUMUL Consolidated Holdings (KCH) Limited em i kampani bilong PNG Gavman.

Pastaim nem bilong KCH em i Independent Public Business Corporation (IPBC).

Gavman bilong Praim Minista Peter O'Neill i bin senisim nem bilong IPBC i kamap KCH.

KCH i save stap aninit long Dipatmen ov Pablik Entaprais na Stet Investmen.

Stat long yia 2012, KCH bin kirapim wanpela plen long senisim Pot Mosbi Siti.

Nem bilong dispela plen em i ol i kolim Lagatoi Siti plen.

Memba bilong Hagen, na Minista bilong Pablik Entaprais na Stet Investmen, William Duma, i tok dispela plen bilong wokim Lagatoi Siti em i plen bilong memba bilong Kavieng, Ben Micah.

Mista Micah i bin stap pastaim Minista bilong Pablik Entaprais na Stet Investmen tasol gavman i bin senisim ol wok na larim Mista Duma i kamap minista long yia 2015.

Stat long yia 2014, wok bilong kirapim Lagatoi Siti i bin kamap taim KCH i muvim sip bris long daun taun Pot Mosbi i go long Motukea Ailan.

“Long mekim disain bilong dispela siti, KCH i bin yusim

K60 milien. Mista Micah i bin stap minista long dispela taim,” Mista Duma i tok.

Em i tok taim KCH i bin laik long muvim Pot Mosbi sip bris i go long Motukea Ailan, KCH i no bin gat mani long mekim dispela.

“Mista Micah i bin stap minista yet na KCH i bin kisim K900 milien dinau mani long baim Motukea Ailan long Curtain Brothers,” Mista Duma i tok.


Long taim bilong opisal komisinin seremoni na hend ova-teki ova seremoni bilong Motukea Pot long yia 2015, Mista Micah i bin tokaut olsem KCH i kisim dinau mani long Bank South Pacific (BSP), Westpac na ANZ benk long baim Motukea Ailan long Curtain Brothers.

Sir Mick Curtain, husat i dai pinis i no bin stap long witnesim dispela seremoni, tasol pikinini man bilong em, Peter Curtain i bin stap long disepela taim.

KCH i bin go pas long mekim Motukea i kamap nupela sip bris bikos Pot Mosbi sip bris bai kamap nupela Lagatoi Siti.

Planti ol siping kampani na ol dokyed i muv i go long Motukea tasol.

“Wankain olsem, Lancron Neval Beis bilong PNG Difens Fos tu i bin painim nupela ples long muv i go aut bikos Lagatoi Siti bai



Siaman bilong KCH, Paul Nerau, Minista William Duma na Menesing Dairekta Garry Hersey.

kisim ples bilong em,” Mista Duma i tok.

Long dispela taim, KCH i bin wokbung wantaim Lens Dipatmen na Difens Dipatmen long painim nupela graun we ol i ken wokim nupela beis bilong nevi.

Mista Micah i tok pastaim ol i bin wanbel long muvim neval beis i go long Tatana Ailan.

“Tasol PNG Ports Corporation i bin tokim mipela olsem Tatana Ailan i no gut-

pela ples long putim neval beis bikos planti sip bai laik long go long Motukea na dispela bai blokim rot bilong sip long solwara,” Mista Micah i tok.

Long edvais bilong PNG Ports Corporation, KCH i bin wokbung gen wantaim Lens Dipatmen na Difens Dipatmen long painim nupela graun.

Ol i bin wanbel long muvim neval beis i go long Manumanu.

Mista Duma i tok kabinet disisen na disisen bilong bod ov dairekta bilong KCH i bin givim tok orait baim 867 hekta graun long Manumanu ausait long Pot Mosbi.

Mista Duma i tok KCH makim K50 milien long baim dispela graun.

Em tok PNGDF i bin yusim sampela bilong dispela mani long rausim ol samting long Lancron Neval Beis na muvim i go long Manumanu. Tasol Mista Micah i tok

dispela graun i stap 10 kilomita longwe long solwara na i no inap long wokim wanpela gutpela neval beis.

“Nevi beis i save stap long solwara o antap long graun?” Mista Micah i askim ol memba long Palamen long Tunde long dispela wik.

Mista Micah i tok dispela K50 milien em long muvim Lancron Neval Beis tasol.

Hap we nau nevi beis i stap bai kamap nupela Lagatoi Siti.

Ol palamen piksa bilong dispela wik



Ol Gavman Minista i redi long go insait long Semba.



Ol Minista na Memba i kam aut long semba bihain long moning sesen.



Ol Gavman Minista i sindaun long semba.



Spika bilong Palamen wantaim klak na namba 2 bilong klak wantaim ol wokman i redi long go insait long Semba.



Ekting spika bilong palamen John Simon i sindaun long sia bilong em insait long semba.



Gavana bilong Oro, Garry Juffa i soim sampela pepa wok em painim aut long ol Bangladesh.

NoiiZiik em namba

wan PNG Khax

NUPELA pilai so bilong Digicel Play, Yu Em Khax i bin ranim ol resis bilong kain kain stail pani, singsing danis na kain kain eksen bilong mekim ol man i lap, na amamas stat long las yia i kam na em i pinis nau taim ol i makim namba wan wina long las wik Sande nait long Pot Mosbi.

Digicel Play i bin tokaut long namba wan wina bilong dispela pilai resis olsem ol NoiiZiik PNG (Beat Boxers) bilong Pot Mosbi olsem namba wan wina bilong dispela resis.

NoiiZiik PNG i winim namba wan prais wantaim K20,000 kes mani na namba tu ples wina Mejik man Jack Spade i kisim K10,000. Namba tri ples wina i go long ol danis grup Vigilante, na ol i kisim K5,000 prais mani.

Ol namba 4 na 5 ples pilai i kisim ol bel kol prais olsem bilong yia saplai wantaim fri Digicel Play TV sabskripsen na Digicel 1Tok Combo Plan.

Yu Em Khax em i kamap long namba wan taim tru olsem wanpela pilai so bilong PNG stret long soim wanem kain kain stail ol pipel bilong PNG stret i gat. Wantaim dispela, PNG i lukim olsem yumi gat sampela kain pasin na stail we inap long mekim ol pipel i amamas na i no ken painim long ol ausait kantri tasol.

Digicel Play i bin statim dispela so wantaim namba wan sisen long pinis bilong yia 2016, bihain long ol i bin singautim planti lain bilong mekim pilai i kam long traim sans bilong ol long Pot Mosbi, Lae, Mt. Hagen na Kokopo.

Digicel Play CEO, Nico Meyer i tok long Sande nait long taim bilong gren fainel olsem dispela em i wanpela gutpela kain so stret.

“Ol sikspela grup we i kam long pinis i soim narapela kain stail stret long ol jas wantaim ol laip odiens o ol lain i go lukim stret long studio na ol lain husat i save lukim long televisen wantaim Digicel Play bokis,” em i tok.

“Yu Em Khax i bringim wanem samting mipela i laikim bai kamap taim mipela i bin tingting long kamapim dispela so long yia 2016. Dispela so i kamautim sampela kain stail na save na i givim sans long ol manmeri nating inap long sain na soim ol yet.

“Mi laik tok kongresulesens long wina bilong so, NoiiZiik PNG, bikos ol i bin wok long mekim ol jas i kirap nogut long olgeta wan wan wik. Ol save na stail bilong yupela em i kirapim gutpela tingting na mi ting olsem bai yupela i ken strong yet long bihainim ol driman bilong yumi long mekim ol lain i amamas long yupela bikos nau yupela i winim pinis PNG namba wan ‘khax’.

“Mipela laik lukim yupela long sain yet long kirapim tingting bilong ol narapela yangpela ol beat boksa long kantri.”

Nico i tok ol lokal prodaksen i no inap kamap gut sapos ol speselais lokal prodaksen tim i no save kamap long olgeta wik.

“Mipela i gat strongpela ol tim produsa long Digicel Play, husat i soim ol narapela kain save bilong ol long



Namba wan wina bilong “Yu Em Khax, NoiiZiik PNG (Beat Boxers).”

taim bilong kisim ol piksa bilong so, Yu Em Khax,” he said.

“Digicel Play i gat strongpela tingting long helpim lokal entetenmen indastri long PNG traim yet long kamap namba wan long mekim PNG i amamas.

“Mipela i bin kisim planti gutpela toktok i kam long ol sabskraiba bilong Digicel Play long dispela gutpela so long olgeta wik.

“Mi laik tok tenkyu tu long ol naispela jas bilong mipela, Calextus Simeon, Mereani Masani, DadiiGii na Mistiq husat i soim save bilong ol long so bisnis wantaim wan wan pilai long olgeta wik.”



Wanpela grup we i bin go insait long ol fainel resis long wik bipo.



Wanpela famili long Lae i bin kamap long lukim wanpela bilong ol laspela so bilong Yu Em Khax.

No gat go kam long Amerika:

Stori bilong ol manmeri long dispela oda

BIKPELA oda bilong Donald Trump long no ken larim ol manmeri bilong 7-pela bikpela Muslim kantri (Iran, Irak, Libia, Somalia, Sudan, Syria na Yemen) i givim hevi long planti tausen manmeri na i brukim ol famili na mekim ol manmeri i tingting planti long wok bilong ol. Hia em stori bilong ol manmeri husat i gat hevi wantaim dispela oda. (Sampela bikos long hevi bilong sekyuriti i askim long no ken tokaut long nem bilong ol).



Pikinini meri wantaim ol protes manmeri long Los Angeles, Amerika i tok egensim nupela lo we i tok long ol manmeri bilong ol bikpela muslim kantri i no ken go kam long Amerika.

Wanpela wokman bilong intenesenel ples balus long Dubai.

Mipela i no kisim wanpela pas long Amerika yet, olsem i kam long gavman, tasol ol toktok mipela i kisim i no tok long ol manmeri husat i gat tupela sitisensip o grin kad, dispela i no klia tumas long save.

Sampela em ol i pasim na sampela em ol i gat tupela tingting. i olsem, sapos wanpela man long Syria husat i gat paspot bilong Amerika, mipela i no inap lukluk long em, mipela bai giaman na tok mipela i no lukim kain paspot olsem.

Wanpela pasindia mipela i pasim na i stap yet long ples balus i bilong Syria we i holim grin kad. Famili bilong em, wok bilong em na olgeta laip bilong em i stap long Amerika na taim em i askim mipela long wanem taim mipela bai lusim em i go, mipela i no save wanem samting mipela bai tok long em. Sori olsem em i bilong Syria, dispela i hat long em i kisim visa long Dubai na dispela i hat long em i go long narapela hap tu.

Long dispela taim sans bilong em long go ong Amerika i stap long wanem ples balus em i go long em. Sapos em i go kampa long Nu Yok, ol bai salim em i kam bek, sapos em i go long Houston, ating ol bai kisim em – samting mipela i painim aut em husat lain i wok long ples balus long taim em i go – bikos polisi bilong olgeta ples balus i no

wankain.

Las tok mi harim em olsem ol i traim olgeta ples balus long Amerika long lukim olsem em i mas kamap long Amerika, na taim em i kamap long hap em i ken putim wari bilong em bipo long ol kot sapos ol i rausim em gen long Amerika. Em i no ken stap olgeta long Dubai.

Yazidi wanpela refuji long Irak, i mas go long Amerika long dispela wiken.

Mi bihainim olgeta lo bilong kisim paspot, visa na rot bilong wokabout tasol taim mi wok long wet long kisim balus, wanpela wokman bilong balus kampani, FlyDubai, singautim nem bilong mi na tok mi no inap go. Mi askim bilong wanem na ol i tokim mi olsem mi mas go toktok long konsulet bilong Amerika. Mi tokim ol olsem mi no inap lusim ples balus bikos mi baim tiket pinis na mi olsem refuji na i no gat mani moa bilong baim narapela tiket.

Mipela i gat hevi hia long Irbil bikos man bilong mi i wok wantaim ol Amerika. Tok nogat long mipela i mekim mipela i pilim nogut tru, moa long ol lain manmeri husat i save helpim ol Amerika. Sapos wanpela i wok wantaim ol Amerika, olgeta famili bai gat hevi long han bilong ol Muslim husat i gat kros.

Mi no traim long go long Amerika bikos long as bilong politik o mani samting; mi ranawe long Irak bikos traib

bilong mi i no bikpela na olgeta de mipela i save stap wantaim pret (Isis) olsem ol bai bagarapim mipela.

Fateme Shams bilong Iran, profesa long Yunivesiti long Pennsylvania.

Bihain long June 2009, taim Islamik Ripabli [ov Iran] i bagarapim na kalabusim famili bilong mi, na salim ol tok nogut long mi taim mi stap long Oxford, we mi wok long pinisim doktret, i luk olsem mi lusim olgeta samting bilong mi.

Laip i bin hat tru na hat long mi stap wankain olsem mi bin stap long em bipo na olsem mi mas wok hat long kamapim ol samting gen. Painim ol nupela poroman na strongim mi gen i bin hat. Em i kisim olsem 7-pela yia long mi long kamap long mak we nau mi stap long em gen (long Pennsylvania – Amerika). Nau mi stap gut bikos long wanpela sain nem.

Olgeta samting mi gat long em i stap wantaim hevi. Mi no bin inap long slip long tupela nait. Mi no inap long slip na toktok gut. Kain hevi i ken kamap long wanpela sapos em i profesa long wanpela top yunivesiti, o sumati o imaignren o refuji. Bikos mama karim yu long Iran, ol i ting yu wanpela teroris na olsem bai i mas gat was long ol stap na ol samting yu mekim long em.

Ol i tambuim yu long ol samting yu mekim. Ol i tambuim yu long wokabout. Ol i tambuim yu long stap olsem wanpela man.

Iran manmeri tokaut long hevi long tok bilong Trump

ODA bilong Donald Trump i mekim planti ol manmeri long ol Muslim kantri i kros na tok bek.

Dispela ol Muslim kantri em Libya, Somalia, Yemen, Iran, Iraq, Syria and Sudan.

Namel long 7-pela kantri Iran i kamapim bikpela grup bilong ol imaignren long Amerika.

Bikos long oda bilong Trump planti bilong ol lain Iran i stap long Amerika i go long sosel midia na tokaut long hevi na wari bilong ol.

Kain oda i mekim planti bilong ol bai bruk lusim famili, wok, skul na ol arapela samting bilong ol.

Em i tok sampela boda gat long Amerika i askim long laptop na sosel netwok paspot bilong ol.

Niaz, husat i stap long Rochester, Nu Yok, i go bek long Amerika bihain long em i malolo wantaim ol poro-

man bilong em long Toronto, Kenada we ol opisa i askim em.

“Ol i askim mi long mi pulimapim wanpela pepa (long ples balus) we ol i askim mi, famili, wok na moa yet mi kirap nogut long givim paswod bilong mobail bilong mi,” em i tokim Guardian niuspepa.

“Ol i kisim mobail na i go bek insait na em i kisim ol olsem wanpela aua olgeta bipo long ol i givim mi bek mobail.

“Na long sekim olgeta samting em i kisim olsem tripela aua olgeta na bihain ol i kisim piksa bilong pinga bilong mi na piksa bilong mi wantaim.

Kiana Karimi, 34, na PhD sumatin i stap long Nu Yok husat i gat paspot bilong Amerika i go long Isip (Egypt) long tupela wik na i kamap long JFK ples balus

long Sarere. Em i tok em i kamap long rum we ol manmeri ol i tambuim ol long kisim visa.

“Inap olsem 15 minit mi wet na sanap long lain, mi no lukim wanpela waitman i stap long lain bilong mipela. Yes wanpela lain we i gat ol braun na blak manmeri husat i luk olsem ol i Muslim i stap,” Karimi i tok.

Foren Minista bilong Iran, Mohammad Jayad Zarif i no amamas long oda Trump i givim.

Em i tok dispela em i “Sem pasin i go long Muslim wol,” na “traim long mekim bel hat bilong ol Muslim husat i pait i go bikpela.”

Em i tok ol bai bekim kain pasin Amerika i mekim long ol.

Tasol Zarif i tok maski kain pasin Amerika i mekim, Iran bai tok orait long ol lain husat i gat trupela visa.

Amerika ami opisa dai long Yemen



Graffiti long Sana'a, Yemen. Pentagon i no toktok gut long ol tok win bilong dai long reid i kamap.

WANPELA Amerika ami opisa i dai long taim Trump i laik daunim wok bilong teroris.

Ripot i tok wantaim dispela, tripela ol arapela opisa i kisim bagarap bihain long wanpela ol Yemen man i reid long hap bilong ol.

Ol i mekim olsem long bekim oda presiden bilong Amerika Trump i mekim long pasim ol manmeri long 7-pela Muslim kantri i no ken go kam long Amerika.

Tasol bekim long dispela ol toktok, het opis bilong ami long Pentagon, Amerika i no tokaut sapos dispela i tru o nogat.

Hevi bilong wanpela ami balus i mekim balus i pun-daun long wanpela hap bilong Yemen.

Ol komando i bagarapim

ol samting bilong dispela balus we ol lokal manmeri husat i stap i tok em i wanpela helikopta.

Ol Amerika i no gat wanpela mausman long Yemen stat long 2015 bihain long Houthi muvmen i rausim ol opisa bilong Amerika long kantri.

Ol Amerika aninit long Barack na Trump i sapotim woa Saudi Arabia i go pas long pait egens long Houthis.

Bihainim dispela ol Amerika i mekim wanpela reid long Yemen na salim ol balus bilong em long wanpela eiakraf keria bilong ol.

“Mipela i sori long dai bilong wanpela sevis man bilong mipela,” Jeneral Joseph Votel husat i komanda long Mideel Is na saut Esia i tok.

“Dispela ol sakrifais em i bikpela samting long pait bilong mipela egensim teroris.

Long wanpela pepa Trump i tok: “Laip bilong wanpela top sevis memba i lus long pait egens long pasin nogut bilong ol Islam teroris. Bikpela tingting na prea bilong mipela i go long ol sevis lain husat i lusim laip bilong ol.”

Em i go moa na tok: “Ol sakrifais we ol man na meri bilong mipela long ami na famili bilong mipela i lusim bek bikpela wok bilong mipela long lukim i gat fridom long wol, lukim wol i stap seif.

Pentagon i tokaut olsem ol sevis manmeri bilong Amerika i no kisim dispela opisa bilong ol long reid.

Kona Bilong Poem...

BUAI, BUAI, BUAI.

Yu save mekim na ol manmeri
 i no save sindaun gut long haus,
 Ol hailans i save lusim ples
 na kam daun long Madang,
 na hangamap nabaut
 long as bilong diwai olsem flying fox.
BUAI, BUAI, BUAI;

Long yu tasol na ol saveman,
 bisnisman, lapun man,
 bikpela man, man nating,
 i save lusim het bilong Somare (K50),
 na het bilong pik (K20).
 Long yu tasol na ol manmeri
 wok long kisim eksiden na dai.

O BUAI, YU PAWA.



Written by Cathlla Raphael. Age: 14, Grade 5 Swina, OHU Primary School, Madang province.

STORI BILONG TUMBUNA

WATPO DOK I SAKIM TOK BILONG MAN

WANPELA taim wanpela man em i stap long wanpela viles. Nem bilong em Yoroka. Em i gat wanpela dok tu. Ol man bilong viles bilong Yoroka klostu ol i laik mekim bikpela singsing, olsem na Yoroka i kisim dok bilong em na i go long bus. Em i lukim wanpela diwai i gat frut long en i stap na em i go wokim liklik haus na em i wet i stap.

Yoroka i wet i go na pisin i no kam na Yoroka i lukluk nabaut na i lukim olgeta pisin i go kaikai long narpela diwai i stap long hapsait bilong wara. Yoroka i lusim dispela diwai na i traim long go long hapsait bilong wara. Tasol em i no

painim rot i go long hapsait bilong wara.

Em i lukluk i stap na i lukim wanpela pato i swim long wara i kam. Pato i askim Yoroka olsem: "Yu tupela i laik go we?" Mitupela i laik go long hapsait bilong wara tasol i no gat rot bai mutupela i ken go." Pato i tok; "Mi bai karim yutupela i go long hapsait bilong wara.

Pato i karim dok i go long hapsait bilong wara na i kam bek na em i karim Yoroka i go long hapsait bilong wara. Yoroka i wokim liklik haus antap long dispela diwai i gat frut long en na sutim sampela pisin. Tasol Yoroka i lukluk i go daun na em i lukim wanpela lapun man i



wokabout i kam klostu long dispela diwai em i stap long en na i tok: "Yu mekim wanem long dispela hap?" Yoroka i tok; "Mi i no gat gras pisin na mi laik painim sampela pisin bilong kisim gras long en."

Lapun man i tok: "Mi gat planti long haus. Yu kam na kisim." Yoroka na lapun man tupela i go long haus bilong lapun. Lapun man i givim sampela kaikai long Yoroka na i tok; "Mi go long haus meri na yu kaikai i stap long haus." Dok bilong Yoroka i bihainim lapun man i go harim wanem tok em i mekim.

Lapun man i tokim meri bilong em olsem; "Mi kisim abus i kam pinis na long nait yumi mas as redim kaikai, ston, lip, na olgeta samting bilong mumu. "Dok i harim dispela tok pinis em i kam bek long papa bilong en na i tokim em. Yoroka, long nait lapun man i laik kilim yumi na yu no ken pasim mi long nait."

Long nait ol i slip na lapun man i kirap na i laik kilim Yoroka na em i kisim bun bilong muruk. Dok i kirap na kaikaim lapun nogut tru.

Lapun i kirap na i tok, mi kol na mi laik mekim paia tasol dok bilong yu i kaikaim

mi na yu mas pasim dok bilong yu. Yoroka i giaman tasol i pasim dok long rop bilong banana. Long biknait tru lapun i laik traim kilim Yoroka gen na lapun i kirap isi isi na i laik katim Yoroka long akis na dok i kaikai lapun nogut.

Mekim olsem tasol i go inap long tulait na ol i mekim save long pait. Yoroka na tok tupela i win. Tupela i kilim lapun na kukim haus na kisim olgeta samting na kam bek long ples.

Dok i tokim papa bilong en olsem; papa, taim yu kilim bikpela pik bilong yumi, orait, yu mas givim mi lilik gris tasol long mi. Papa i kilim pik na dok i kam sindaun klostu long papa na papa i tok; "Yu rabis, dok klia long hap."

Dok i kros long papa na i go antap long Mt. lalibu na i singautim olgeta dok olsem: "Yumi save harim tok bilong man na ol man i no save tok bilong yumi. Na yupela i no ken harim tok bilong olgeta man."

Dispela dok i tambuim olgeta dok na ol dok i no save harim tok bilong man.

Even E. Wapa Pangia/S.H.P

PAINIM WOD PILAI

Ol wod lista:

ARAN
DOLA
MAN
OFIS
PLENTI
BAR
DANIS

PANI
SINGSING
KRUHAT
BRUM
LIMBUM
PRESEN
SOIM

KUKURAI
MILIS
SISTA
TATANGU
WANWIN
YELO
KULAU

WANSOSPEN
TAIMS
RAUS
INK
BRUS

R N K N D N W O Q S P I E S T B J P J K Y T S S S
 C N D E I K T S R F S P S I F L W E E S V S R E T
 O C T I Y D H P W M D C R S E E T G C Z U A N R E
 E S F C H U S I K T A T E S H A M C O O K S E L Y
 E N S E O J G E W I O Z N A L G R D F G C H D C U
 F G S N T U C P E G E T T E E O B E A E T B O E N
 O E Z R U M Y X H O O R O N R T R E A T A O T Y X
 W L F P A M C I B T O T N A I F H Q F D I U L S O
 O Z Y H G U M T A O F C I P I V H O N O A E E H T
 H E E P W I S F R G I O C B N N G O G M I I B R E
 A A N O Y I O N O N S Y J G K R Z H N I I V H I R
 Y M P S J C T W A N W I N L M E K W E N G F L P E
 V G Q S I Q G P E V S C S P O W A R F I D Z D N T
 P L B S E L F P A I O P E T R N R S H N T J P I X
 I E R T E S S I N G S I N G A M E B A A M N K M K
 I U U G M O R A A M N C F M C K D R H K E I U O X
 B H S I S I D D R W N C A M O K A U O S T B L A S
 W S A N U M G O T A G S E H M E R M E T M E A I H
 B T A T A N G U L D M A L K U K U R A I Y C U A S
 O W T D E M O I A A I L E E G R P P L E N T I F R

Ansa bilong Wod Pilai isu 2210

B E X L D K C S A B A G I N P H B T K A K A O G C
 K O R E P O S S K A N D A R A B I S M A N F S A Z
 E E Y I M K D E G T T H A C O T K H A R T D F I P
 P L I T O G E T O B A U B A U T S W A R D R J C A
 I C N O P Q T S E T K G A T V R O A I E T E S A
 G T A T X E Q S L F I H J Q A A L K O G L P M S L
 C M R E Y G D E H P S N P L H B W U N L E A I K W
 E L O G W P S T I E M G S A A E A R S O G R N M Y
 H R H W E C X T U T T I N A S L R A T R G A O S O
 K C M G T R P A E X D S E T V M A T M I W U B C X
 R Y O V S R S E G E C A D J S E A T M A Q N T W G
 K Y I F O Z P F E E P E Q J I R V N B T T P L I C
 P U C O V I S O S E O N E O N I O M E S C E E N M
 E A I R G N P E L T A T I N G O A E D H O L I I I
 P D I E V S R O C P E B E O E N F C R E K A S S I
 E Q N T O D P R U E C B P E L M I M A O V Z L I V
 X E B L A O K Y R S S E G G P R I U A S M N I M D
 K W P J K I T E E X O S F D E O O A T U C T W A S
 S C D S E N C A E F L H I S I W A O E F N R Q T Z
 E R R S E H H D L I I P C E R T L P E Q R R A I N



Australia Wes Papua pipel protes long Indonesia embasi

Caroline Tiriman i raitim

OL polis long Kenbera, kepitel bilong Australia long Mande i kalabusim wanpela Wes Papua man long wanpela protes we em na ol pipel bilong em i mekim ausait long embasi bilong Indonesia.

Polis i bin givim tu tok lukaut long sampela manmeri husat i protes long noken mekim trabel, tasol ol Wes Papua manmeri na ol sapota bilong ol i tok bai ol i go het long kempein agensim ol rait bilong ol manmeri long Indonesia husat i save mekim long ol Wes Papua manmeri.

Despela protes i wanpela tasol long ol narapela long planti kantri long wol we ol manmeri bai tokaut na soim sapot long ol manmeri bi-



Wes Papua protes long Kenbera, Australia.

long Wes Papua long kisim Fridom.

Indonesia i nogat laik long larim ol manmeri bilong Wes Papua long bruk lusim kantri na long dispela as Indonesia i wok long kilim planti manmeri husat i go agens long gavman bilong em long hap.

I kam inap nau ol i tok 500 tausan manmeri i dai pinis long han blong gavman bi-

long Indonesia.

Dispela pait bilong ol Wes Papua manmeri nau i wok long kisim moa sapot long planti pipal long wol, wantaim ol manmeri bilong Pasifik.

Na lain bilong Yunaited Libaresen Movmen bilong Wes Papua (ULMWP) nau i wok long askim strong long kamap olsem ol ful memba bilong Melanesian Spiahed Grup o MSG.

Komisin mekim awenes

Caroline Tiriman i raitim

DAIREKTA bilong Leitana Nehan Dvelopment agensi long Bougainville, i tok wok bilong statim Bougainville Referendum Komisen nau bai strongim ol wok bilong skulim na toksave gut long ol manmeri long indipendans referendum long 2019.

Mrs Helen Hakena i mekim dispela tok bihain long ol sinia gavman opisa bilong Atonamus Bougainville Gavman na Papua Niugini Gavman i bin sainim ol agriman long Tunde bilong redim dispela vot.

Ol i tok bikpela wok bilong dispela Komisen em bilong redim dispela referendum long 2019 bilong save sapos Bougainville bai lusim Papua Niugini o nogat.

Mrs Hakena i tok tenkyu tu



Bipo BRA na resisten man i mekim pasin bel isi long Katukuh long Bougainville.

long ol lida bilong tupela sait long luksave na rispektim bel isi tok orati we i wok long go het gut wantaim dispela wok blong mekim referendum.

Oganaisesen bilong em, Leitana Nehan Dvelopment

agensi i bin statim ol awenes long dispela referendum long yia i go pinis we ol i save go long olgeta ples long Bougainville long tok klian long wanem samting tru em dispela referendum.

PNG 2017 Feson wik na Klaimet Senis

Caroline Tiriman i raitim

KLAIMET SENIS bai kamap wanpela bikpela samting we ol bai toktok na soim long Fason wik bilong Papua Niugini long Ogas dispela yia.

Dairekta bilong PNG Fasion Wik (PNGFW). Janet Sios, i tokaut long dispela taim ol i bin lonsim long stat bilong dispela wik.

Em i tok ol i laik yusim dispela Fason long tokaut long bikpela wari em klaimet senis i wok long kamapim nau long ol manmeri bilong PNG na ol narapla kantri long Pasifik rijen.

2017 Fasion wik bai kamap olsem namba tu long sosel kalenda bilong PNG, bihain long ol i bin holim namba wan Fason wik long 2016.



Ol pikinini bilong Takuuf atols, em ol i save kolim tu long Mortlock Ailan long Bougainville.

As tingting bilong PNG Fasion wik em bilong soim ol gutpela save bilong ol atis na ol desaina bilong PNG olsem ol i gat namba long Fason indastri.

Sampela biknem bilong Fason blong Australia, Fiji

na Tonga bai stap tu long despla Fasion wik long PNG. Janet Sios i tok olsem sampla atolls olsem Caterets na Mortlocks long Bougainville nau i bagarap pinis long ol solwara bihainim Klaimet Senis.

Manus Lida i tok Australia mas pasim hariap asailum senta

Caroline Tiriman i raitim

MEMBA bilong Manus open long Papua Niugini Palaman i askim strong ol gavman blong PNG na Australia long hariap na pasim ditensan senta na pasim ol asailum sika i save kamapim ol trabel olsem repim meri.

Ronny Knight i mekim dispela askim bihain long polis long Manus i bin sasim wanpela asailum sika long banis bilong Australia we i holim ol refuji long Manus Ailan long repim wanpela yangpela meri

long ol dispela de i go pinis.

ABC niusman long PNG, Eric Tlozek i ripot olsem dispela hevi i kamapim planti kros long ol lokal manmeri long Manus, long wanem ol i no laikim ol dispela refuji na asailum sika i stap long Manus.

ABC niusman long PNG Eric Tlozeki ripot kandre meri bilong dispela yangpela meri i tok em i wari nogut tru.

Dispela kandre meri bilong yangpela meri i tok tu olsem dispela man bilong Sri Lanka i bin bungim yangpela meri long maket na kisim

em i go long wanpela hotel long biktaun Lorengau.

Ol lain wan pisin bilong dispela meri i bin kisim em i go long haus sik, we ol i bin tokim polis na ol polis i holim pasim dispela Sri Lanka man, sasim em na putim em long kalabusim.

Long yia i go pinis, gavman blong Australia i bin tokaut olsem em bai pasim ditensan senta, tasol i kam inap nau, moa long 800 ol asaieum sika na refuji i save lusim senta na go raun natlong long ol lokal ples.

Graun guria long Solomon Ailan i kamapim wari

Sam Seke i raitim

OLGETA manmeri long west sait long Solomon Aila i pret na wari taim strongpela guria i sekim ol ailan klostu long Bougainville long las Sande avinun.

Mak bilong guria em 7.9 magnitut we dispela ol atoriti i ting inap long kamapim bikpela solwara o tsunami - tasol gutpela olsem dispela i no kamap na i kamapim liklik bagarap long Shortlands.

Menesa bilong SIBC Redio Happy Lagoon long Gizo, Sina Adrian i tok ol manmeri long Gizo, Westen provins



Haus bilong wanpela famili i bin bagarap long graun guria long 2016 long Kirakira.

na ol manmeri long ol ailan klostu na i pret na was tasol long ranawe sapos ol i lukim sain bilong tsunami.

Tasol guria long Epril 2, 2007 i kamapim tsunami we

i bagarapim sampela ples na kilim 51 manmeri.

Dispela guria i bin kamap tu long sampela provins bilong Papua Niugini olsem Nu Ailan na Nu Briten.

Ol Pasifik wok politik long 2017

Caroline Tiriman i raitim

OL wok politik long Pasifik rijan bai go het long kamapim wari long dispela yia 2017.

Displa em toktok bilong wanpela save meri long ol wok politik long rijan, Dokta Tess Newton Cain husat i Prinsipal bilong TNC Pasifik Konsalting na tu em i wan-

pela savemeri long Dvelopment Polisi Senta, long Australia Nesenel Yunivesiti long Canberra.

Tess Newton Cain i tok olsem Nesenel ileksan long Papua Niugini long dispela yia bai lukim planti toktok na wari i kamap long dispela ileksan.

Hevi long ikonimi bilong

PNG tu bai kamapim planti toktok.

Em i tok narapela samting we bai ol i toktok planti long em long 2017 em Wes Papua na membasip bilong ol long Melanesia Spiahed grup.

Ol wari long politik bai kamap tu long Polinesia na Maikronesia.

Ramu NiCo Plen long kamapim kwaliti prodaksen long 2017



Haidro Maining wok i go het nau long Ramu NiCo KBK Main.

RAMU NiCo Projek i plen long wokim kwaliti bilong prodaksen bilong miks haidroxaid prodak (MHP) i go antap long 2017.

Dispela bai kamap taim em stretim ol wok gut long teknikal eria bilong en na bihainim ol teknikal plen em i kamapim long las yia 2016.

Presiden bilong Ramu NiCo Menesmen (MCC) Gao Yongxu i tokaut long dispela long Tunde, Janueri 24 Wok Konpres bilong Kampani. Toktok bilong em i go aut long kampani menesmen husat i

stap harim long KBK Main, Basamuk Rifaineri, Madang Bes na het opis long Beijing.

Mista Gao i tokaut olsem dispela wok plen long kamapim gutpela kwaliti prodaksen i go wantaim bikpela salens na wok em mama kampani MCC Grup i laikim Ramu NiCo i mas kamapim.

Em i tokaut olsem ol wok mentenens na wok bilong stretim ol prodaksen masin i kamap long bringim kamap gutpela kwaliti long sait long prodaksen.

Mista Gao i tokaut tu

olsem gutpela wok kamap long bringim ap prodaksen long sait long haidro maining i kamap long KBK Main. Dispela em ol i yusim wara long rausim graun na yusim ol spit bilong wara hos we ol i sutim strong graun na rausim graun na ston na kisim nikel/kobalt graun.

Em i tokaut olsem long las yia Ramu NiCo Menesmen i tok kamapim samting gutpela teknikal wok long sait long helpim prodaksen na dispela ol wok bai helpim gut prodaksen long dispela yia 2017.

Muthuvel askim long mani India laik givim



Gavana bilong Wes Nu Briten, Sasindran Muthuvel.

Aja Potabe i raitim

OL opisa bilong Treseri Dipatmen i wok long stretim ol toktok wantaim EXIM Bank bilong India long kisim US\$ 100 milien (K325 milien) dinau mani long gavman bilong India.

Minista bilong Treseri, Patrick Pruaitch, i tok tupela gavman bilong India na PNG i no gat wanpela agrimen long kisim dinau mani long EXIM Bank bilong India.

“Dispela i mekim hat liklik long kisim dispela mani i kam insait hariap long kantri. Ol opisa bilong Treseri Dipatmen i wok long stretim ol toktok na mekim ol pepa wok long PNG Gavman i kisim dispela mani i kam insait,” Mista Pruaitch i tok.

Tupela gavman bilong

India na PNG i bin sainim dispela agrimen taim Presiden bilong India Pranab Mukherjee i bin kam raun long PNG long wanpela opisal stet visit.

Gavana bilong Wes Nu Briten, Sasindran Muthuvel, i bin askim Mista Pruaitch long kwesten taim long Palamen long Tunde long dispela wik sapos gavman i wok long mekim wok long kisim dispela mani.

Gavana Muthuvel i tok dispela mani bai go long kirapim wanpela fo-lein haiwe long Kimbe, kirapim nupela Madang-Baiyer rot, na mekim wanpela nupela kot haus long Mt Hagen.

“Wanem samting i mekim na yumi isi isi long kisim dispela mani i kam insait. Dispela mani em i mas kam insait long kantri.



Minista bilong Treseri, Patrick Pruaitch.

“Yumi nidim dispela mani long kirapim dispela tripela projek. Kantri tu i sot long mani na dispela mani bai helpim PNG.

“Intres reit bilong ol i no bikpela tumas olsem long narapela benk, tasol em i 1.5 pesen.

“Mi laik askim sapos gavman i ken hariapim ol wok long kisim dispela mani i kam insait,” Mista Muthuvel i tok.

Mista Pruaitch i tok Treseri Dipatmen i wok long stretim toktok wantaim EXIM Bank bilong India bikos dispela em i nambawan taim long PNG i kisim kain mani olsem long dispela benk.

Taim ol i pinisim ol toktok, ol bai stretim ol pepa wok na sainim agrimen long PNG i kisim dispela mani.

Trukai sekyuriti bai kisim risev polis trening

KAMPANI bilong mekim namba wan rais bilong PNG, Trukai Industries, i sainim wanpela patnasip agrimen wantaim Polis long larim sampela wok manmeri bilong Trukai i kamap risev polis.

Aninit long Risev Polis Program, Royal PNG Constabulary (Polis) bai helpim sampela ol wok manmeri bilong Trukai Industries long kisim trening long Bomana Polis Kolis long kamap risev polis.

Polis Komisina Gari Baki na Trukai Industries CEO Greg Worthington-Eyre i sainim pinis dispela agrimen long las wik Fonde long Polis hetkwata long Konedobu, Pot Mosbi.

“Aninit long dispela agrimen, Trukai Industries bai larim 8-pela sekyuriti wokman bilong em i kisim trening long kamap risev polis,” Mista Worthington-Eyre i tok.

Mista Worthington-Eyre i tok Trukai i bin makim dispela 8-pela man long kamap namba wan wokman bilong em long kisim dispela trening bikos ol i gat eksprens long wok wantaim Polis, Ami na CIS.

Namba bilong ol wok sekyuriti bilong Trukai husat bai kisim risev polis trening aninit long dispela program bai go moa long 20 long bi-



CEO bilong Trukai Industries, Greg Worthington-Eyre, i sainim agrimen wantaim Polis Komisina Gari Baki.

hain taim.

Mista Worthington-Eyre i tok Trukai Industries i luksave tu olsem ol polis manmeri i save wok aninit long bikpela presa bikos ol i no gat inap risos.

“Mi bilip olsem dispela patnasip wantaim polis bai helpim polis long mekim sampela wok we bai sot long risos long mekim,” em i tok.

Mista Worthington-Eyre i tok; “Planti taim ol polis manmeri i save sot long kar o men pawa long mekim wok long komyuniti.

“Pasin bilong brukim lo na kamapim asua bilong lo na oda em i bikpela long ol komyuniti bilong yumi.

“Dispela patnasip bai helpim ol komyuniti bikos risev polis bilong mipela bai

stap redi long helpim ol taim ol i stap long hevi bilong lo na oda.”

Em i tok dispela em i gutpela samting we Trukai i mekim long helpim ol manmeri na bringim gutpela sindaun long komyuniti.

Mista Worthington-Eyre i tok Trukai Industries i amamas long strongim wok bilong polis long komyuniti na mekim sefti bilong ol manmeri i kamap namba wan samting taim ol i bungim hevi bilong lo na oda.

Ol sekyuriti wok manmeri bilong Trukai bai kisim dispela trening long Bomana Polis Kolis.

Ol i mas gat klin rekot na ol i mas pasim trening kos long Bomana Polis Kolis long kamap risev polis.

Polye: Gavman mas stretim rot long Hailans

Aja Potabe i raitim

PRAIM Minista Peter O’Neill na gavman i givim baksait long ol namba wan eria bilong developmen long kantri, Oposisen Lida Don Polye i tok.

Mista Polye i mekim dispela toktok long Palamen long las wik Fraide.

Em i tok wanpela namba wan samting we gavman inap ong lukluk em i rot.

Mista Polye, husat i bin ran long Okuk Haiwe na raun long Hailans klostu taim tasol, i tok planti rot i no stap gut.

Dispela i mekim Mista Polye i autim dispela toktok long Palamen long taim bilong grivens dibeit.

Mista Polye i givim nem bilong ol rot we gavman i mas lukim hariap na mekim wok mentenens.

“Ol rot long Hailans rijon we i nidim mentenens wok em ol Kagamuga - Mt Hagen taun rot long Westen Hailans, Togoba rot long Westen



Oposisen Lida Don Polye.

Hailans, Kaupena rot long Sauten Hailans,” em i tok.

Mista Polye i tok sampela seksen bilong Hilans Haiwe long Simbu, Jiwaka, na lsten Hailans i no stap gut tu,” em i tok.

Em i tok sampela seksen bilong Hailans Haiwe long Madang na Morobe provins tu i no stap gut.

“Hailans Haiwe em i namba wan rot bilong dispela kantri. Ikonomi bilong PNG i stap long dispela rot.

Gavman i mas stretim ol dispela rot hariap,” em i tok.

Mista Polye i tok sapos gavman i no gat mani long stretim ol dispela rot, ol i mas tokaut na tok stret olsem gavman i no gat mani.

“Mipela olgeta save olsem kantri i sot long mani. Tok stret na tokim pipel olsem kantri i sot long mani long mekim mentenens wok long stretim rot o givim arapela sevis long pipel,” Mista Polye i tok.

UNITECH sumatin lainim wok long Ramu NiCo main leboratori

FOAPELA meri sumatin husat i mekim namba tri yia skul bilong Aplaid Kemistri long Yunivesiti bilong Teknoloji (UNITECH) long Lae nau i stap mekim wok prektikal bilong ol wantaim Ramu NiCo main operesen long Madang.

Ramu NiCo kampani i save givim sans yet long ol sumatin bilong ol yunivesiti na ol koles long kantri long lainim wok bilong maining wantaim em. Na dispela kain pasin i bin stat yet long taim kampani i bin statim operesen long Madang.

Kampani i mekim bikpela wok long helpim ol nesanel sumatin long stretim tingting na save bilong ol long kain wok olsem. Long wan wan yia, Ramu NiCo Kurumbukari Main na Basamuk Rifaineri i kisim ol sumatin long lainim wok wantaim kamapni.

Ol dispela 4-pela sumatin i wokim skul bilong Aplaid Kemistri olsem na nau ol i wok wantaim Leboratori Dipatmen bilong Kurumbukari (KBK) Main sait.

Nem bilong ol dispela meri sumatin em; Flora Taka, Christine Hassor, Doel Andrews na Larisha Mirino. Ol i statim tripela mun trening bilong ol long stat bilog Desember 2016 na bai pinis long Februari 2017.

Taim ol i stap wantaim KBK Prosesing Leb, ol i

lainim long yusim ol nupela kain leb fasiliti na wok eria long main. Em i wanpela sans bilong ol yangpela meri sumatin long opim tingting bilong ol na save long laip tru bilong wok ausait long leksum o klasrum.

“Mipela i lainim planti nupela samting long ol Saina supevaisa bilong mipela, Li Dan na ol narapela senia PNG wokman na meri long leb na ol nupela eksperiens.

“Ol i lukautim mipela gut wantaim ples slip na gutpela kaikai,” Flora Taka i tok.

Flora Kata em i namba wan pikinini insait long wanpela famili bilong Morobe. Em i

bilip olsem hatwok na resis strong long mekim wok long helpim long lukautim ol liklik brata na susa bilong em.

Em i bilip olsem dispela em i wanpela gutpela sans long laip we em i putim tingting bilong em i go insait long lainim samting na em i mas kisim moa eksperiens long wok we em inap mekim bihain long taim skul bilong em i pinis.

Ol dispela yangpela meri i tok ol laik kamap olsem ol gutpela piksa bilong ol narapela yangpela meri i kam bihain na ol tu i laik bihainim ol narapela winmeri long maining indastri long PNG.



Ol UNITECH sumatin i sanap kisim poto long Ramu NiCo KBK Main sait eria bilong slip long Kurumbukari maunten.

Madang taun i no gutpela long ol turis

Mathew Yakai i raitim

OL pipel bilong Madang i amamas long gutpela wok bilong Melanesian Tourism Service na Sir Peter Barter long bringim turis i kam long Madang wantaim sampela moa bai kam long P&O Krus Lain long Februari 15, tasol ol pipel i wari long taun i no stap gut.

Olgeta stri na rot insait long taun i luk nogut tru long ain a em i soim olsem ol provinsal lida i no gat tingting long promotim wok bilong turisim long provins.

Insait long dispela piksa i soim raunabout long fran bilong Madang Butchery o Anderson, we em i no stap longwe long bikpela bris we

P&O Krus lain bai kam sua na putim anka long en.

Planti moa strit bilong Madang taun nau i gat wankain lukluk olsem na ating ol turis bai lukim pastaim ol bikpela hul long rot olsem ol hul long ol maunten paia.

Planti ol kar na trak i save painim hat tru long ran long dispela ol hap rot. .



Poto: Mathew Yakai.

Bundi papa graun yet bai lukautim kampani

Mathew Yakai i raitim

ARIKRO Investment Ltd, wanpela papagraun kampani bilongol lain Bundi we Ramu NiCo i stap long en bai menesim na ranim ol kampani bilong ol yet.

Long Fraide, Januəri 27, Menesing Darekta bilong Tamane Lodge, Edward M. Kiza husat i save menesim Arikro Investment Ltd Bas Sevis we i save ran namel long rilokesin ples Enikuwai na Ramu Riva Bris i givim wok bilong menesmen na papa long kampani i go long Arini-Krongu sab klen bilong Pagaizi klen. Pagazi klen em wanpela bilong ol 4-pela bikpela klen we i papa bilong dispela hap graun we Ramu NiCo i dikim nikel na kobalt.

Arikro Bus Sevis em ol i kamap long 2014 taim mains inspektoret bilong Minerel Risos Atoroti (MRA) i bin askim KBK Main long kamapim taim ol i lukim ol asples lain i bin wokabout namel long hap ol ples we bikpela masin na kar i wok long dikim na karim nikel na kobalt. Lo bilong main i tok tambu long ol manmeri i wokabout long hap ol ples we wok main i kamap long en.

Olsem na Ramu NiCo i bin givim kontrak bilong kamapim bas sevis namel long asples na Ramu Riva bris i go long Arini-Krongu sab klen we i bin kam ananit long kampani bilong ol, Arikro investment Ltd long ranim dispela bas sevis.

Edward Kiza i tok taim KBK Main i givim bisnis, ol papagraun ino gat mani long



Eddie Kurame i kisim ki bilong bas long Edward Kiza long taim bilong hendova seromoni long KBK Main long las wik Fraide.

baim bas na menesim olsem na Tamane Lodge i bin baim tupela bas na menesim bilong ol i kam inap las Fraide Januəri 27 we em i givim i go bek long ol papagraun yet long menesim na ranim.

Ananit long dispela kontrak, Ramu NiCo save baim wanpela bas K700 long wanwan dei.

“Mipela les long wok wantaim ol ausait lain bikos mani bai go ausait. Maski i gat planti risk, ol famili sindaun na wanbel long helpim bikos dispela em ol klen memba bilong mipela tu na ol i mas benefit long dispela KBK Main tu,” Mista Kiza i tok.

Long las Fraide, Mista Kiza i givim wanpela bas na i tok olsem narapela tupela nupela bas bai ol kisim long stat bilong mun Februari na em i givim tu wanpela K30,000.

“Benk akaun bilong Arikro em i klin na no gat dinau. Nau mi gat bikpela bilip olsem ol nupela dairekta na menesmen i ken ranim dispela bas sevis kontrak na mekim

kamap bikpela na olgeta lain i ken kisim sampela helpim long en,” Mista Kiza i tok.

Siaman bilong Arikro investmen, Eddie itirai wantaim wanpela darekta, Eddie Kurame i tok bikpela tenkyu long Mista Kiza long baim, statim na menesim dispela bas sevis i kam inap taim em i givim i go bek long ol papagraun.

Mi salensim ol klen memba long sapotim dispela bisnis na no ken kam askim mani na ol kain kain samting we bai lukim dispela kampani bilong yumi bruk daun,” Mista Itirai i tok.

KBK Mine Rejista Menesa, Sarimu Kanu i tok kongresulesin i go long ol papagraun na tok wok bisnis i mas ran gut na lukim planti gutpela samting bai go long ol papagraun. Mista Kanu i tok tenkyu tu long tupela nupela bas we bai helpim kampani long karim ol asples lain we bai helpim sefti bilong Ramu NiCo i go bikpea moa bihainim lo bilong MRA.

Wan wol Rait kontes bai kamap long US yunivesiti

YUNAITET Nesen Akedemik Impek husat i wok wantaim (ELS) edukesen sevis bai sponsaim namba 4 tok ples, wan wol raiting kontes o resis bilong sumatin na global yut forum.

Dispela yia i bringim kamap Not Isten yunivesiti long Boston, USA bai holim dispela kibung bilong kainkain tokples, wanpela wol global yut forum na ol sponsa na ol man i go pas long bung bilong Nolsten Yunivesiti Global yut konprens.

Bai gat 60 wina ol i bai makim long go insait long 2017 kainkain tokples, wan wol global yut forum we ol bai kamapim Eksen plan we

laik wankain olsem Yunaitet Nesens 2030 agenda bilong sastenabel developmen insait long 6-pela tokples bilong Yunaitet Nesens.

ELS Edukesen sevis inc. bai givim wanwan wina long tiket long i go long Boston na Niu Yok siti namel long Julai 15-26, 2017. Long bung bilong global yut forum, olgeta sumatin bai kamapim eksen plan bilong wanwan topic bilong sastenabel developmen agenda, na bai givim ol tinting long Yunaitet Nesen het kwota insait long Niu Yok Siti.

ELS Edukesen Sevis ,inc. Bai givim Balus tiket, haus na kaikai i go long dispela sumatin.

Olgeta sumatin we bai tek pat mas raitim originel stori gat 2,000 wod. Dispela rait bai mas toktok long global sitijen na save bilong kalsa na wok bilong save long planti kain tokples. Raita mas soim save bilong em long pesenel ,akedemik, kalsa na nesen konteks. Manmeri husat i laik tek pat, i mas wanpela ful taim yunivesiti sumatin, husat i kisim tok orait long fekaliti memba na i mas abrusim 18 krismas.

Long stap insait long dispela kontes, olgeta rait o essay mas stap long opisal tokples bilong Yunaitet Nesens na i no long tokples bilong sumatin yet.

Ol Tigers i lukluk long yangpela pilaia

OL Wests Tigers i makim nupela yangpela senta pilaia, Moses Suli, long stap wantaim ol long 3-pela moa sisen long klap bilong ol inap long pinis bilong 2020 sisen.

Junia pilaia bilong Fairfield United, Harold Matthews, na SG Ball bilong Balmain Tigers i go insait long Anda 20 skwat bilong Wests Tigers taim tupela wantaim i winim 17 yia.

Het Kosa bilong Wests Tigers, Jason Taylor, i tok olsem em i lukluk long Suli long em i mekim gut long klap taim em i winim 18 yia.

"Mipela i lukluk long em insait long sotpela taim na em i mekim gut we Moses i ken joinim ol Wests Tigers nau," Taylor i tok.

"Ol lain husat i lukim Moses taim em i bin pilai long junia tim bilong mipela



Moses Suli bai kamap nupela yangpela pilaia bilong ol Wests Tigers

i lukim olsem kala bilong em i kamap narapela kain tru. Dispela namba wan kala i soim olsem em i ken mekim gut long ol prisen training na dispela i mangalim tingting bilong mipela ol kosa na mipela i amamas tru.

"Em i stap liklik taim wantaim ol namba wan gret tim

bilong mipela insait long dispela prisen na dispela i soim olsem em i gat spesel samting long luk save.

"Mipela i lukluk long holim em strong insait long NRL grup insait long liklik yia i kam, bikos ol wanem kain strong em bai kisim insait long klap bai helpim em long go het."

Ol Ham i krosim Payet

WEST Hammers i krosim Dimitri Payet long em i no gat komitmen na rispek bihain long em i bin joinim ol Marseille.

Ol Hammers i no laik salim em na join-siaman, David Sullivan, i tok em i laikim pilaia long stap wantaim ol na kamap olsem em.

Tasol, Sullivan i tok moa olsemmenesa, Slaven Bilic i tok orait long ol i rausim em aninit long intres bilong ol skwat i kamap wan.

Payet i sainim wanpela foa na hap yia kontrak wantaim Ligue 1 klap.



Dimitri Payet i no bin pilai wantaim West Ham inap long ol Manchester Siti i daunim ol, 5-0.

Federer i daunim Nadal

BIKPELA resis i kamap namel long wol namba 17 na wol namba nain we i no gat wanpela pilaia i bin kamap olsem Federer na Nadal long histori bilong tenis resis.

Em i mak long 31 mun inap Nadal i bin go insait long kwata fainal long bikpela resis i bin kamap pastaim. Na wankain tasol, Federer i

bin winim taitel bihain long 7-pela yia i go.

Dispela em i wanpela strongpela fainal namel long tupela we Federer i daunim Nadal.

"Tenis em i strongpela spot," Federer i tok Komenteta bilong BBC nius i tok olsem em i winim taitel long 35.



Roger Federer i winim namba bihain long em i bin daunim Rafael Nadal.18 Grend Salm.

Hayne na James i go pas long 9s tonamen



Ol i bin makim Jarryd Hayne olsem strongpela Titan, husat bai go pas long 2017 Oklan Nains resis.

PULBEK bilong Titans, Jarryd Hayne, na strongpela prop, Ryan James, i joinim 19 man skwat bilong ol Gold Coast na resis long 2017 Dauna Oklan Nains tonamen.

Taim Hayne i pilai long tupela de resis we ol i bin tokaut paslain. Bihain ol i bin kisim James wantaim namba wan pilaia, Tyrone Roberts na Kane Elgely i

soim sain long kosa, Neil Henry, long kisim ol. Ol skwat bilong Titans long 2017 Oklan Nains tonamen em;

- Morgan Boyle
- Alexander Brimson
- Tyler Cornish
- Anthony Don
- Kane Elgely
- Jarryd Hayne
- Ryan James

- Max King
- Chris McQueen
- John Olive
- Nathaniel Peteru
- Pat Politoni
- Leivaha Pulu
- Tyrone Roberts
- Tyrone Roberts-Davis
- Hayden Schwass
- Paterika Vaivai
- Daniel Vidot
- William Zillman

Kaufusi i lukluk long gutpela bihain bilong Orijin



Felise Kaufusi long han kais i redi long go insait long Orijin.

FELISE Kaufusi i bin lukim namba wan Stet ov Orijin resis em i Gem namba 1 bilong yia 2007 siris.

Namba wan brata bilong em, Antonio, i bin pilai long Kwinslan long Sankop Stadium na olgeta hauslain bilong Kaufusi i bin stap long Bundaberg long lukim wanpela strongpela pran-roa i bin pilai long bikpela hap bilong NRL.

Long namba 23 minit,

brata bilong em i bin kisim bagarap long skru bilong em na i no bin pilai inap long namba 3 Gem bilong dispela siris i pinis na ol Blus i daunim ol Maruns, 18-14, long ANZ pilai graun.

Nau, Kaufusi i stap long kem bilong Kwinslan Emejing Orijin long RACV Royal Pines long Gold Coast long las wiken long go insait long Orijin edukesen. Em i bilip olsem em bai go insait long

orijin sapos Walters i makim em wanpela fowod bilong Storms long bihain.

Taim Corey Parker i go aut, Nate Myles, Sam Thaiday na Jacob Lillyman i laikim Kaufusi long stap wantaim na makim stet bilong em long 2017.

"Em i bikpela samting long mi bin kam insait long skwat long las yia na nau mi bai pilai strong long lainim planti samting," Kaufusi i tok.



Gutpela Risk Menesmen Trening kamap long KBK Main



Ol lain long trening i go long KBK Main long prektikol bilong ol long glasim ol birua.



Ol Ramu NiCo wokman long KBK Main husat i stap long Risk Menesmen trening.



Trening insait long KBK trening rum.



Prektikol long sekim ol hazad long KBK Main.

OLGETA wan wan wokman meri i gat wok long tokaut sapos i gat birua i stap long wok ples bilong ol. Dispela bai helpim long stopim na tu putim banis long birua no ken kamap. Sefti em bikpela samting

Dispela em bikpela skul toktok we i bin kamap long Ramu NiCo KBK Main long las wik taim 20 tim lida i bin stap long tupela de risk menesmen trening.

Helt, Sefti na Envairomen Kwaliti Asurens Menesa, Bernice Suma i bin go pas long ranim dispela tupela de trening we i karamapim planti ol eria long risk menesmen.

Trening i karamapim

planti gutpela skul long sait long lukautim wok ples, gutpela risk menesmen wok, na impruvmen na bikpela samting em komiitmen o pasin bilong lukautim sefti we olgeta lain i mas bihainim oltaim.

Insait long dispela trening ol tim lida i lukluk i go insait long risk menesmen modul bilong Ramu NiCo na wanem ol eria na tuls em Ramu NiCo menesmen bai yusim taim birua i kamap na rot long banisim na stopim.

Ol lain husat i stap long trening i kisim skul long klasrum na bihain ol i go long main eria long glasim na sekim wanem ol birua i stap na tokaut long en.

Ol lain long long trening i bin gat sans tu long luksave long tripela kain ol birua i stap em namba wan em birua ol manmeri i ken lukim, birua we i hait i stap na namba tri em birua we i laik i kam o redi long kamap.

Olgeta lain husat i stap long dispela risk menesmen trening i amamas tru long trening ol i kisim bikos olgeta i tokaut olsem ol i lainim planti gutpela samting.

Komyuniti Afes (CA) opisa long KBK, Robon Lani i tokaut olsem dispela trening i gutpela stret na i helpim em wantaim gutpela lesen long sait long risk menesmen. Em i tokaut olsem em i lainim

planti nupela samting na infomesin em i kisim bai helpim em long wok bilong em.

Robon Lani i givim bikpela tenkyu long HSE Asurens Menesa, Bernice Suma long trening bikos em bai givim gutpela tingting long ol wokman long save long risk menesmen na helpim ol long luksave long wanem kain ol birua i stap.

Robon i tok olsem olgeta wokman bilong Ramu NiCo mas kisim kain trening olsem long save long ol birua na tu save long bikpela samting long sefti. Dispela em bikos sefti em bikpela samting olgeta lain mas save long en.

KBK Main Dvelopmen Di-


patmen Logging kontrola, Sobby Giok i tokaut olsem sefti em bikpela samting long maining wok, na dispela risk menesmen trening em gutpela bikos em bai opim tingting bilong ol tim lida long save long risk menesmen na surikim wok bilong sefti i go daun long olgeta wok lain bilong ol.

KBK Main Trensport Supavaisa, Lee Issac i tokaut tu olsem dispela risk trening em gutpela, tasol em i laikim olsem ol lain i stap long trening i mas kisim pepa o pemit long gat luksave long putim was long strongim sefti long wok ples. Taim ol i gat ol ID kat bai stopim na givim ed-

vais long ol arapela lain long banisim ol birua o noken mekim samting i no stret.

Tripela memba bilong KBK Imejensi Rispons Tim (ERT) Charlie Isidor, husat em tim lida, paia opisa Munar Yaya na ERT treini Gabbie Willie i tokaut olsem dispela trening em gutpela na helpim ol gut long sait long save moa long sefti na pasin bilong banisim birua.

Ol i tok olsem trening i gutpela tru na moa wok lain long KBK Main i mas stap long kain trening olsem. Taim moa wokman i kisim kain trening long sait long sefti em bai gutpela bikos sefti kalsa bai stap oltaim long wok ples.



135 KM Slurry Pipeline

KBK Mining

BSK Refinery

Lewas bai pilai tupela traim resis



OL skwat bilong City Pharmacy PNG Lewas.

OL City Pharmacy PNG Lewas bai pilai tupela traim resis long stat i go inap long Intenesenel Kriket Kaunsil (ICC) 2017 Wol Kap Kualifaia resis bilong ol meri long Kolombo, Sri Lanka.

Ol Lewa bai pilai egensim ol Sri Lanka Emerging long KTZ pilai graun long Februari 3 na namba tu traim resis egensim ol Thailand long Moors pilai graun long Februari 5.

Ol taim bilong Wol Kap Kualifaia resis bai kamap em; Resis namba wan em ol PNG Lewas bai pilai egensim Bangladesh long Februari 7, Resis namba tu em ol Lewas egensim Pakistan long Februari 10, Resis namba 3 bai kamap long Februari 11 namel long Lewas na Skotland na Resis namba 4 bai kamap

long Februari 13 namel long Lewas na Saut Afrika. Lewas em i wanpela long ol 10-pela tim bai resis long kisim ples i stap long go resis long Wol Kap bai kamap long Yunaitet Kingdom (UK) long Jun 26 i go inap long Julai 23 bilong dispela yia. Ol top 4 kantri bilong kwalifaia resis bai kisim ol 4-pela ples long resis long Wol Kap.

Palais i makim ol skwat bilong resis long Sydney Sevens



Ol skwat bilong Papua Niugini Palais.

PAPUA Niugini Palais tim i tokaut long ol skwat bai resis long Sydney Sevens Tonamen bai kamap long Australia long dispela wiken.

Ol i makim 12-pela skwat husat i bin lusim kantri long Tunde long resis long tonamen bai kamap long Februari 3 i go inap long Februari 4, 2017.

Ol i makim Kymlye Rapilla, Joanne Lagona na kepten bilong ol, Lynette Kwarula, na ol narapela yangpela pilaia husat i save gut long resis.

Ol narapela yangpela pilai husat ol i bin makim ol long namba wan taim bilong ol long resis long ol bikpela gem em Mavis Mitaharo, Fatima Rama na Cathy Puro. Ol dispela tripela pilaia i lukluk long soim kala bilong ol long wol level.

Ol skwat i bin stap long trening kem long Pot Mosbi inap long tripela wik bihain long 10-pela de kem long Desemba 2016.

Ol i bin mekim fainal trening bilong ol long Mande bipo long ol i lusim kantri long Tunde.

Kosa bilong ol John Larry i tok olsem wok redi bilong ol i kamap orait long taim bi-



Ol PNG Palais i bin trening.

long trening kem we ol i bin rausim 6-pela pilaia long makim fainal 12 skwat.

Traning bilong ol i kamap strong we ol i bin lukluk long stail kala bilong ol na strong bilong ol long strongim banis.

“Namba wan samting em i bilong mekim wok redi long go resis long Hong Kong Sevens tonamen bai kamap long Epril. Hong Kong Sevens tonamen em i bilong kamap kwalifaia long go resis long Wol Siris.

I gat 12 kantri bai resis long dispela Hong Kong tonamen na ol i bin putim

PNG long Grup A wantaim ol bikpela tim Nu Silan, Canada na France.

Dispela em i namba wan taim bilong PNG na ol i no bin resis long Olimpik Gems. Ol skwat em:

- 1 Lynette KWARULA
- 2 Kymlye RAPILLA
- 3 Casandara SAMPSON
- 4 Joanne LAGONA
- 5 Mavis MITAHARO
- 6 Freda WAULA
- 7 Fatima RAMA
- 8 Cathy PURO
- 9 Threseanne DAIMOL
- 10 Tavai LAVAI
- 11 Helen ABAU
- 12 Alice ALOIS

PNG i dro wantaim Oklan

PAPUA Niugini Anda 17 soka tim bilong ol man i pinisim namba tu poroman resis egensim ol Oklan em ol i bin kisim wankain poin, 3-3. Dispela resis em ol i mekim wok redi bilong go resis long Osenia Futbol Konfederesen (OFC) Anda 17 Sempionsip.

Dispela namba tu poroman resis i kamap namel long ol PNG wantaim Oklan Sentral Ekedemi Futbol Klap (ACAFC) i bin kamap long las wik Sarere, Januəri 28, long Mt Smart long Oklan, Nu Silan.

Ol Oklan Sentrel Ekedemi i bin pilai gut we ol i bin skoaim ol tripela poin kwiktaitim inap long ol i bungim 30 minit bilong namba wan hap bilong resis.

Ol PNG i strongim ol yet bihain long pinis bilong namba tu hap bilong resis we Jonathan Allen na Yagi



Ol Anda 17 pilaia bilong PNG i redi long pilai egensim ol Oklan long poro resis i kamap long las wik Sarere.

Yasasa i bringim skoa i kam antap long 3-2 insait long 5-pela minit.

Namba tu hap bilong resis i kamap orait long sait bilong ol PNG tasol ol i no winim mak.

Barthy Kerobin bilong PNG i kisim las skoa klostu long pinis bilong resis taim na bungim ol skoa bilong ol Oklan, 3-3.

Ol PNG bai pinisim wok redi bilong ol wantaim las

poroman resis egensim ol One Hunger Mangere long Febueri 4 bipo long ol bai lusim Oklan long Februari 6 bilong go long Tahiti.

OFC sempionsip bai kamap long Tahiti long Februari 11 i go inap long Februari 24.

PNG i stap long Grup A wantaim Nu Kaledonia, Tahiti na Vanuatu na ol tim i stap long Grup B em Fiji, Samoa, Solomon Ailan na Nu Silan.

Ol Pukpuk i no win long ol de namba wan resis

OL PNG Pukpuk i lus long ol tripela gem i kamap long namba wan de bilong HSBC Wol Ragbi Sevens 2016 i go inap long 2017 siris long Wellington.

Stat bilong ol i no kamap orait we ol Ingran i bin daunim ol wantaim, 12-0.

Long namba tu resis bilong ol, Kenya i bin daunim ol 47-5. William Tirang bilong ol PNG i kisim dispela skoa.

Ol Pukpuk i bin pilai strong long namba tri gem bilong ol egensim ol Argentina.

Ol Argentina i bin stap pas wantaim 7-0 poin, tasol Tirang i putim namba tu trai bilong em long dispela tonamen we Emmanuel Guise i

kikim konvesen kik i go insait long bungim skoa, 7-7.

Ol Pukpuk i stap pas, 14-7, bihain long Arthur Clement i putim wanpela trai na Guise i no painim hat long kisim tupela poin long konvesen kik.

Tasol, ol Argentinian i bungim skoa bipo long taim bilong malolo bihain long German Schultz i putim wanpela trai. Ol i isi tasol kisim tupela moa poin long konvesen kik na skoa i sanap olsem 14-14.

Ol PNG i sotwin long namba tu hap bilong resis we ol Argentina i bin putim 5-pela trai, 41-14, na ol i win.

Ol Pukpu tu i bin pilai egensim ol Samoa we ol Samoa i daunim ol, 37-5.

Ol narapela risal em;

- Nu Silan i daunim ol Samoa, 33-7,
- Canada i daunim ol Wales, 28-5,
- Skotland i daunim ol Rasia, 12-5,
- Fiji i daunim ol Japan, 56-0,
- Ingran i daunim ol Argentina, 26-7,
- USA i daunim ol Samoa, 24-12,
- Nu Silan i daunim ol France, 21-14,
- Canada i daunim ol Rasia, 29-0,
- Skotland i daunim ol Wales, 31-7,
- Australia i daunim ol Japan, 33-12,
- Saut Afrika i daunim ol Fiji, 31-12.



Ol pukpuk i no paik strong na ol i go daun.

Fainal bilong Ipatas Kap bai kamap long dispela wiken



Pilaia bilong Mix Dogs i redi long takolim birua bilong em.

POM Muruks i kisin nupela yunifom long Handy Fainens



POM Muruks i kisin nupela yunifom.

Philemon Tame i raitim

POT Mosbi Muruks i bin kisin bikipela sapot na i go insait long Coca Cola Ipatas Kap long las wiken bihain long ol i bin kisin nupela yunifom long Handy Fainens Menesmen.

Jenerel Menesa bilong kampani, Ismael Nelsen, i tok olsem Handy Fainens em i no wanpela bikipela kampani olsem ol narapela fainensel kampani, tasol aninit long kopret na sosol

empawamen wok bilong komyuniti, Handy Fainens i amamas long helpim na sapotim tim.

“Mi laikim yupela ol pilaia long kamap namba wan mausman bilong kampani na pilai tru olsem ol spot man na meri,” Nelson i tok.

Lawrence Puyu i makim maus bilong tim na i tok tenkyu long Handy Fainens Menesmen long ol i bin givim sapot long tim.

“Pot Mosbi Muruks em i of-sisen tim we ol yangpela

boi long Sauten Hailans husat i i save stap long Pot Mosbi i bin kamapim dispela tim. Lukluk bilong dispela klap em i bilong larim ol namba wan pilaia i ken go insait long Digicel Kap resis,” Puyu i tok.

Em i tok moa olsem sampela ol pilaia husat i luk save gut long ol pilaia we ol bai go pas long Muruks olsem Joshia Keviamie bilong Mendi Muruks/ Galp Isapeas na Missach Wallen bilong Pot Mosbi Vipers.

PNG sevens i pilai gut

PAPUA Niugini Ragbi Futbal Union i tokaut olsem PNG sevens tim bilong ol man husat i go resis long Wellington sevens tonamen i mekim gut tru.

Sif Eksekutiv Opisa bilong PNGRFU, Paul Joseph, i tok olsem PNGRFU i no gat wanpela tingting olsem ol bai mekim gut.

“Mipela i save long ples klia olsem tim bilong mipela i stap insait long wanpela

strongpela pul we wok redi bilong ol i no kamap gut olsem mipela plen long en,” Joseph i tok.

Em i tok moa olsem kosa na tim i lukluk long wok redi bilong go resis long Hong Kong sevens tonamen bai kamap long Epri 7 i go inap long 9.

Taim bilong resis bai kamap long Wellington egensim ol top tim em i wanpela samting mipela i laikim long pilai.

Ol PNG Skwat em;

- Henry Kalua
- Willie tirang
- Danny Opa
- Nathan Baramun
- Wesly Vali
- Manu Guise
- Arthur Clement
- Freddy Rova
- Dean Manale
- Gairo Kapana
- Patrick Tatut
- Manu Guisr

8-pela tim i givim nem long 2017 POMRFL sisen

LONG Pot Mosbi Ragbi Futbal Lig (POMRFL), 8-pela klap tasol i bin bai afiliesen fi bilong ol long resis long dispela sisen.

Edministrata bilong POMRFL, Meke Maino, i tok olsem ol Wests, Tarangau, Hohola Flies, Paga Panthers, Dobo Warriors, Brothers, Butterflies na Souths i bin baim K1,000 afil-

iesen fi bipo long pinis taim bilong rejista.

“Ol dispela tim i bin bringim ol benk risit i kam long mi na mi bin putim long rekot.

“Ol 6-pela klap i no baim afiliesen fi bilong ol yet,” Maino i tok.

Long wankain taim, 2016 Anual Jenerela Miting (AGM) em ol i bin skruim i go antap moa long Februari 3.

long raun wan bilong tonamen.

Ol Miks Mate i daunim ol birua wantaim 8 poin bipo long raun 2 bilong CCIC i stat namel long Hohola Flies na United. Ol Flies i daunim ol United, 18-2.

Ol NBC Watchdog i daunim ol POM Muruks wantaim 4 poin, 14-10.

Long ol narapela resis em ol City Red Backs i daunim NDB Aviator wantaim 28 poin taim ol Freeway Bumpers i winim ol Paga Panthers, 20-14, na QPR Wanderers Waigaini i kulim strong bilong ol Ira Lai wantaim tupela poin, 6-4.



Daniel Opa bilong Papua Niugini i rausim bal egensim Ingran pilaia long namba wan de bilong HSBC Wellington Sevens tonamen.



Pilaia bilong QBE i lukluk long salim bal long wan pilaia bilong em taim pilaia bilong CPL i ran long stopim em.



Praivet netbal eksen long Rita Flynn kots long Mosbi.



Rana bilong Yokomo i ran kam hom taim ketsa bilong Eagles i leit long autim em. Eagles i kamapim bikpela win long dispela pilai bilong ol.



Beta bilong Eagles i redi long paitim bal na putim gut was long pitsa bilong Yokomo long men gem bilong A gret man long Bisini.




Minista Tkachenko i putim piksa bilong nupela pilai graun na stedium bilong PNG AFL. Dispela pilai graun bai senisim Bisini taim em kamap.



Beta bilong PNG Pawa i abrusim bal bilong pitsa bilong Difens long A gret pilai bilong ol long Bisini.



Mista Sape i redi long sevim bal long opim 9 mile opsisen volibal na tas ragbi.



WHITE TUNA FLAKES
DIANA White



Manufactured by:
RD Tuna Canners Ltd.

WHITE TUNA
insait
K 2.20



Tasty and Flavourful White Tuna for Everyone!

Ol i tokaut long SP Hunters 2017 sisen

Philemon Tame i raitim

MINISTA bilong Spot, Justin Tkatchenko, na ol mausman bilong PNG Ragbi Futbal Lig (PNGRFL) long Ragbi Lig Wol Kap bilong 2017, ol sponsa, stekholda na ol sapota i stap wantaim long taim ol i tokaut long SP

Hunters tim long dispela yia.

Menesing Dairekta bilong SP Brewery, Stan Joyce, i kam insait long kampani long 1952, SP i stap sapota bilong ragbi lig long kantri. "Mipela i save mekim olsem bikos ragbi i save bungim ol pipel bilong kantri we ol narapela spot i no

inap long mekim olsem," Joyce i tok.

"Mi bilip olsem PNG i senisim Kwinslan Ragbi Lig resis bikos SP Hunters tim i joinim ol. Na mipela i amamas long dispela," Joyce i tok. CEO bilong PNGRFL, Reatau Rau, i soim amamas bilong em long SP Brewery bilong ol

i go het na sapot olsem ol i bikpela bilong ol Hunters long 2013 i kam inap nau.

Rau i tok tenkyu long ol sponsa i sapotim ol SP Hunters na i tok olsem ol bai no inap long bungim dispela kain mak sapos ol sponsa i no stap baksait long ol.

"Mipela i mekim bikpela

mani taim mipela i lukautim ol Hunters. Dispela em i bikpela bisnis we mipela i lukautim nau. Mipela bai no inap long stap long dispela kain mak, sapos ol sponsa na gavman i no helpim mipela," Rau i tok.

Rau i tok moa olsem PNGRFL i gat bikpela bilip olsem kosa bilong Hunters, Michael Marum, na tim bilong em i save gut long tim i lus long tripela sisen i go na nau ol i lukluk long pinis long top.

Long wankain taim, siaman bilong SP Hunters, Graham Osborne, i tokaut olsem Ase Boas bai kamap kepten bilong dispela sisen na Wellington Albert bai kamap deputi.

Ol i bin givim taim long siaman bilong SP PNG Hunters, Graham Osborne, long tokaut long kepten na vais-kepten we Wellington Albert i kamap vais-kepten bilong dispela sisen.

"Mi no tingting long kamap kepten, tasol mi em i wanpela senia pilaia long tim na mi gat bikpela ama-

mas long lukautim tim long dispela yia.

"Mi tok tenkyu long kosa na menesmen bilong Hunters long ol i bilipim mi na makim mi olsem kepten. Mi em kepten, tasol olgeta pilaia em ol lida long rait bilong ol yet," Boas i tok.

Wellington Albert tu i kirap nogut taim ol i makim em vais-kepten.

"Mi bin guria taim ol i tok olsem mi bai kamap vais-kepten bikos mi no bin harim wanpela liklik tokwin long mi bai kamap vais kepten, nogat.

"Nau mi lukluk long go pas long ol boi na tim bilong mipela," Albert i tok.

Intras Supa Kap resis bai stat long namba wan wik bilong mun Mas we ol Hunters bai pilai egensim ol Central Capras Browne Pak, Australia, long 6 klok apinun i go inap long Mas 4.

Namba wan asples gem bilong ol bai kamap long raun namba 2 long Sande, Mas 12, egensim ol East Tigers long Nesanel Futbal Stediam, Pot Mosbi.



Kepten bilong ol SP Hunters, Ase Boas, i toktok.

Strongpela Marasin Bilong Kus Gutpela Prais!

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

